


全五代詩

附補遺

一三





全 五 代 詩

附 補 遺

(三十)

李 調 元 編



叢書集成

初編

主編者
王雲五

商務印書館發行

全五代詩卷八十

閩

徐 夔

夔字昭夢莆田人登乾寧進士第授祕書省正字依王審知後去歸隱延壽溪著有探龍釣磯

二集

後村徐先輩集序徐君端衡出其十一世祖唐正字公夔文集又纂輯公遺事及年譜以示余按劉山甫誌墓詩賦外有著書二十卷溫陵集十卷南渡初公族孫著作郎師仁作集序有雅道機要一卷得于蔡君謨家者今皆不傳

所傳者律賦及探龍集各五卷詩八卷而已夫士不幸而不過于當時所賴以自見于後世者書爾而公所著它書皆羽化惟詩賦與鷹語僅存豈不重可嘆歟然其僅存者已足與子華致光並驅矣唐人尤重公賦目爲錦繡堆日本諸國至以金書人生幾何賦御溝水斬蛇劍詩等篇爲屏障後村跋語徐先輩唐李擢第不肯事朱梁歸死於莆其墓只書徐先輩與朱文公書晉處士陶潛何異先輩晚年有偶題詩云賦就長安振大名斬蛇功與樂天爭歸來延壽溪頭坐終日無人問一聲之句今釣磯草堂基猶存至曾孫以薄俸能廉官卑不屈爲王黃州所稱又詩如豐年甲子春無雨良夜庚申夏足眠身閑不厭常來客年老偏憐最小兒又五言歲計懸僧債以此知閩人貧苦貧僧而取其息自唐已然矣九國志夔常遊大梁以賦謁全忠誤觸其諱梁王色變夔狼狽欲遁去恐不得脫乃作過大梁賦以獻略曰千金漢將感精魄以神交一眼僧夫望英風而騰落梁王得賦大喜遺縑五百疋蓋全忠曾夢淮陰侯指授兵法而晉王克用則眇一目者也已而走歸鄉里審知禮待簡略不能平一旦拂衣去十國春秋夔初登第試止戈爲武賦一燭燄盡已就有破山加點擬戍無人之句禮部侍郎李擇覽而奇之夔賦膾炙人口黃滔爲武節度推官審知餽以魚鮓滔與夔方接譚即請夔爲謝牋夔援筆即書云

銜諸斷索，裁從羊續懸來，列在綢盤，便到馮驩食處。時人大稱之，其最著者過驪山賦，略曰：融金液，灑下地之江河，帖玉懸珠，皎窮泉之日月，斬蛇劍賦，略曰：空山吞象之蛇，豈銚蓮鏹，大澤銜珠之血，不汚星光，勾踐進西施賦，略曰：概成而瑞玉凝彩，服麗而朝霞剪紅，御澆水賦，略云：時時而翡翠隨波，飛穿禁柳，往往而鸞鸞逐浪，銜出宮花，他賦多類此。湧幢小品，畫婁月，君與畫僧隱，畫有贈內詩云：神傳尊勝陀羅呪，佛授金剛般若經。

昔遊

昔遊紅杏苑，今隱刺桐村。歲計懸僧債，科名負國恩。不書眠慚穩，頻鑷鬢無根。惟有經邦事，年年志尚存。

北山秋晚

十載衣裘盡，臨寒隱薜蘿。心閒緣事少，身老愛山多。玉露催收菊，金風促剪禾。燕秦正戎馬，林下好婆娑。

旅次寓題

胡爲名利役，來往老關河。白髮隨梳少，青山入夢多。途窮憐抱疾，世亂恥登科。卻起漁舟念，春風釣綠波。

題南寺

欠別猿啼寺，流年劫逝波。舊僧歸塔盡，古瓦長松多。壁薜昏題記，窗螢散薜蘿。平生英壯節，何故旋消磨。

題僧壁

香廚流瀑布，獨院鎖孤峰。紺髮青螺長，文茵紫豹重。卵枯皆化燕，蜜老卻成蜂。明月留人宿，秋聲夜著松。

河流

洪流盤砥柱，淮濟不同波。莫訝清時少，都緣曲處多。遠能通玉塞，高復接銀河。大禹成門嶮，爲龍始得過。

釣臺

金門誰奉詔，碧岸獨垂鈎。舊友祇樵叟，新交惟野鷗。嘉名懸日月，深谷化陵丘。便可招巢父，長川好飲牛。

和人經隋唐間戰處

孤軍前度戰，一敗一成功。卷旆早歸國，臥屍猶臂弓。草間腥半在，沙上血殘紅。傷魄何爲者，五湖垂釣翁。

追和常建歎王昭君

紅顏如朔雪，日燦忽成空。淚盡黃沙雨，塵消白草風。君心爭不悔，妾恨竟何窮。願化南飛燕，年年入漢宮。

贈嚴司直

承家居闕下，避世出關東。有酒劉伶醉，無兒伯道窮。新詩吟閣賞，舊業釣臺空。雨雪還相訪，心懷與我同。

贈董先生

壽歲過於百，時閒到上京。餐松雙鬢嫩，絕粒四肢輕。雨雪思中嶽，雲霞夢赤城。來年期受籙，何處待先生。

贈東方道士

葫蘆窗畔挂，是物在其間。雪色老人髻，桃花童子顏。祭星秋卜日，採藥曉登山。舊訪長生鹿，時銜瑞草還。

弔崔補闕

近來吾道少，慟哭博陵君。直接巖前竹，孤魂嶺上雲。縉紳傳確論，丞相取遺文。廢卻中興策，何由免用軍。

弔赤水李先生

三年悲過隙。一室類消冰。妻病入仙觀。子窮隨嶽僧。荒邱寒有雨。古屋夜無燈。往日清猶著。金門幾欲徵。
蜀葵

劍門南面樹。移向會仙亭。錦水饒花豔。岷山帶葉青。文君慚婉婉。神女讓娉婷。爛熳紅兼紫。飄飄入繡局。
雞

名參十二屬。花入羽毛深。守信催朝日。能鳴送曉陰。峩冠裝瑞壁。利爪削黃金。徒有稻粱感。何由報德音。
白鴿

舉翼凌空碧。依人到大邦。粉翎棲畫閣。雪影拂瓊窗。振鷺堪爲侶。鳴鳩好作雙。狎鷗歸未得。覩爾憶晴江。
龜

行止竟何從。深溪與古峰。青荷巢瑞質。綠水返靈蹤。鑽骨神明應。酬恩感激重。仙翁求一卦。何日脫龍鍾。
銀結條冠子

日下徵良匠。宮中贈阿嬌。瑞蓮開二朵。瓊縷織千條。蟬翼輕輕結。花紋細細挑。舞時紅袖舉。纖影透龍綃。
酒胡子

紅筵絲竹合。用爾作歡娛。直指寧偏黨。無私絕覬覦。當歌誰擐袖。應節漸輕驅。恰與真相似。瓊裘滿領鬚。
香鴨

不假陶鎔妙。誰教羽翼全。五金池畔質。百和口中煙。觜鈍魚難啄。心空火自燃。御爐如有闕。須進聖君前。

依溫飛卿華清宮二十二韻

地靈蒸水暖。天氣待宸遊。嶽拱蓮花秀。峰高玉蕊秋。朝元雕翠閣。乞巧繡瓊樓。碧海供驪嶺。黃金絡馬頭。
五王更入帳。七貴迭封侯。夕雨鳴鴛瓦。朝陽暎柘裘。伊臯爭負鼎。舜禹讓垂旒。墮珥閒應拾。遺釵醉不收。
飛煙鳴劍戟。殘月照旌旒。履朔求衣早。臨陽解佩羞。宮詞裁錦段。御筆落銀鈎。帝里新豐縣。長安舊雍州。
雪衣傳貝葉。蟬鬢插山榴。對景瞻瑤兔。昇天駕綵虬。此言遊月宮羽書陳北虜。元甲撥犀牛。聖詰多屯否。生靈少怨尤。穹旻當有輔。帷幄豈無籌。鳳態傷紅豔。鸞輿緩紫駟。樹名端正在。人欲夢魂休。識語山傍鬼。塵銷隴畔邱。重來芳草恨。往事落花愁。五十年鴻業。東憑渭水流。

東風解凍省試

暖氣飄蘋末。凍痕消水中。扇冰初覺泮。吹海旋成空。入律三春照。朝宗萬里通。岸分天影闊。色照日光融。
波起搖輕綠。鱗遊乍躍紅。殷勤排弱羽。飛翥趁和風。

尙書命題瓦硯

遠向端溪得。皆因郢匠成。鑿山青靄斷。琢石紫花輕。散墨松香起。濡毫藻句清。入臺知價重。著匣恐塵生。
守黑還全器。臨池早著名。春闈攜就處。軍幙載將行。不獨雄文陣。兼能助筆耕。莫嫌涓滴潤。深染古今情。
洗處無瑕玷。添時識滿盈。蘭亭如見用。敲戛有金聲。

釣絲竹

藿藿拂清流。堪維舴艋舟。野蟲懸作餌。溪月曲爲鈎。雨潤搖塔長。風吹繞指柔。若將諸樹比。還使綠楊羞。蠶婦非堯女。漁人是子猷。湖邊舊栽處。長映讀書樓。

和僕射二十四丈牡丹八韻

帝王城裏看。無故亦無新。忍摘多緣借。移栽未有因。光陰嫌太促。開落一何頻。羞殺登牆女。饒將解佩人。蕊堪靈鳳啄。香許白龍親。素鍊籠霞曉。紅粧帶臉春。莫辭終夕醉。易老年身。買取歸天上。寧教逐世塵。

公子行

十五轅門學控弦。六街騎馬去如煙。金多倍着牡丹價。髮白未知章甫賢。有耳不聞經國事。拜官方買謝恩牋。相如謾說凌雲賦。四壁何曾有一錢。

漢宮新寵

位在嬪妃最上頭。笑他長信女悲秋。日斜月滿可能久。花落色衰殊未憂。宮主鏡中爭翠羽。君王袖裏奪金鈎。妾家兄弟知多少。恰要同時拜列侯。

上陽宮詞

點點苔錢上玉墀。日斜空望御樓西。粧臺塵暗青鸞掩。宮樹月明黃鳥啼。庭草可憐分雨露。君恩深恨隔雲泥。銀蟾借與金波路。得入重輪伴羿妻。

開元卽事

曲江真宰國中訛，尋奏漁陽忽荷戈。
堂上有兵天不用，幄中無策印空多。

楊國忠時兼諸使館三十二課印

慶驚騎透潼關

華清宮

十二瓊樓鑲翠微，暮霞遺卻六銖衣。
桐枯丹穴鳳何去，天在鼎湖龍不歸。
簾影罷添新翡翠，露華猶溼舊珠璣。
君王魂斷驪山路，且向蓬瀛伴貴妃。

再幸華清宮

腸斷將軍改葬歸，錦囊香在憶當時。
年來卻恨相思樹，春至不生連理枝。
雪女塚頭瑤草合，貴妃池裏玉蓮衰。
霓裳舊曲飛霜殿，夢破魂驚絕後期。

李翰林

謫下三清第幾班，獲調羹鼎侍龍顏。
吟開瑣闥窺天近，醉臥金鑾待詔閒。
舊隱不歸劉備國，旅魂長寄謝公山。
遺編往簡應飛去，散入祥雲瑞日間。

開長安庚子歲事

羽檄交馳觸冕旒，函關飛入鐵兜鍪。
皇王去國未爲恨，寰海失君方是憂。
吾色大雲凝蜀郡，幾般妖氣撲

神州唐堯縱禪乾坤位。不是重華莫漫求。

詠懷

愁花變出白髭鬚。半世辛勤一事無。道在或期君夢想。貧來爭奈鬼揶揄。馬卿自愧長櫻疾。顏子誰憐不是愚。借取秦宮臺上鏡。爲時開照漢妖狐。

偶吟

千卷長書萬首詩。朝蒸藜藿暮烹葵。清時名立難皆我。晚歲途窮亦問誰。碧岸釣歸惟獨笑。青山耕徧亦何爲。尋常抖擻懷中策。可使降他兩鬢絲。

偶書

巧者多爲拙者資。良籌第一在乘時。市門逐利終身飽。谷口躬耕盡日饑。瓊玖鬻來燕石貴。蓬蒿芳處楚蘭衰。高皇冷笑重瞳客。蓋世拔山何所爲。

偶題

閒補亡書見廢興。偶然前古也填膺。秦宮猶自拜張祿。楚幕不知留范增。大道豈全關歷數。雄圖強半屬賢能。燕臺財力知多少。誰築黃金到九層。

寓題

酒壺棋局似閒人。竹笏藍衫老此身。託客買書重得卷。愛山移宅近爲鄰。鳴蛩閣上風吹病。落葉庭中月

照貧見說天池波浪闊，也應涓滴踐窮鱗。

寓題述懷

大道眞風早晚存，妖訛成俗汙乾坤。宣尼旣沒蘇張起，鳳鳥不來雞鶩喧。藟少可能供驥子，草多誰復訪蘭孫。堯庭忘卻徵元凱，天闕重開十二門。

退居

鶴舍松心合在山，五侯門館怯趨攀。三年臥病不能免，一日受恩方得還。明月送人沿驛路，白雲隨馬入柴關。笑他范蠡貪恠甚，相罷金多始退閒。

閉門

閉卻閉門臥竹房，更何人與療膏肓。一生有酒唯知醉，四大無根可預量。骨冷欲針先覺痛，肉頑頻炙不成瘡。漳濱伏枕文園渴，盜跖縱橫似虎狼。

招隱

齒髮那能敵歲華，早知休去遮塵沙。鬼神只闕高明里，倚伏不干棲隱家。陶景豈全輕組綬，留侯非獨愛煙霞。贈君吉語堪銘座，看取朝開暮落花。

溪隱

將名將利已無緣，深隱清溪擬學仙。絕卻腥羶勝服藥，斷除杯酒合延年。蝸牛殼滿寧同舍，榆莢花開不

是錢鸞鶴久從籠檻閉。春風卻放紙爲鷗。

開窗

閉戶開窗寢又興。三更時節也如冰。長閒便是忘機者。不出真如結夏僧。環堵豈慚蝸作舍。布衣寧假鶴爲翎。薔薇花盡薰風起。綠葉空隨滿架藤。

酒醒

酒醒欲得適閒情。騎馬郵勝策杖行。天暖天寒三月暮。溪南溪北兩川名。沙澄淺水魚知釣。花落平田鶴見耕。望斷長安故交遠。來書未說九河清。

勸酒

休向尊前勸羽觥。百壺清酌與君傾。身同綠樹年年老。事比紅塵日日生。六國英雄徒反覆。九原松柏甚分明。醉鄉路與乾坤隔。豈信人間有利名。

斷酒

因論沈湎覺前非。便碎金罍與羽卮。探茗早馳三蜀使。看花甘負五侯期。窗間近火劉伶傳。坐右新銘管仲辭。此事十年前已說。匡廬山下老僧知。

夢斷

夢斷紗窗半夜雷。別君花落又花開。漁陽路遠書難寄。衡嶽山高月不來。元燕有情巢繡戶。靈龜無應祝

金杯人生若得長相對。螢火生煙草化灰。

髻髮

鬢添華髮數莖新。羅雀門前絕故人。減食爲緣疎五味。不眠非是守庚申。深園綠竹齊抽笋。古木青蛇自脫鱗。天地有爐長鑄物。濁泥遺塊待陶鈞。

綠鬢

綠鬢先生自出林。孟光同樂野雲深。躬耕爲食古人操。非織不衣賢者心。眼衆豈能分瑞璧。舌多須信爍良金。君看黃閣南遷客。一過瀧州絕好音。

人事

人事飄如一炷煙。且須求佛與求仙。豐年甲子春無雨。良夜庚申夏足眠。顏氏豈嫌瓢裏食。孟光非取鏡中妍。平生生計何爲者。三逕蒼苔十畝田。

龍蟄

龍蟄蛇蟠卻得伸。和光何惜且同塵。伍員豈是吹簫者。冀缺非同執耒人。神劍觸星應變化。良金成器在陶鈞。穰侯休忌關東客。張祿先生竟相秦。休說雄才間代生。到頭難與運相爭。時通有詔徵枚乘。世亂無人薦禰衡。逐日莫矜駑馬步。司晨誰要牝雞鳴。林中且作煙霞侶。塵滿關河未可行。

草木

草木無情亦可嗟。重開明鏡照無涯。菊英空折羅含宅。榆莢不生原憲家。天命豈憑醫藥石。世途還要辟蟲沙。仙翁乞取金盤露。洗卻蒼蒼兩鬢華。

休說

休說人間有陸沈。一樽閒待月明斟。時來不怕滄溟闊。道大卻憂潢潦深。白首釣魚應是分。青雲干祿已無心。梓桐賦罷相如隱。誰爲君前永夜吟。

嘉運

嘉運良時兩阻修。釣竿蓑笠樂林邱。家無寸帛渾閒事。身似浮雲且自由。庭際鳥啼花旋落。潭心月在水空流。晨炊一箸紅銀粒。憶着長安索米秋。

潤屋

潤屋豐家莫妄求。眼看多是與身讎。百禽羅得皆黃口。四皓山居始白頭。玉燦火光爭肯變。草芳崎岸不曾秋。朱門粉署何由到。空寄新詩謝列侯。

驕侈

驕侈阝危儉素牢。鏡中形影豈能逃。石家恃富身還滅。顏子非貧道不遭。蝙蝠亦能知日月。鸞鳳那肯啄腥臊。古今人事惟堪醉。好脫霜裘換綠醪。

不把魚竿

不把魚竿不灌園。策筇吟遶綠蕪村。得爭野老眠雲樂。倍感閩王與善恩。鳥趁竹風穿靜戶。魚吹煙浪噴晴軒。何人買我安貧趣。百萬黃金未可論。

逐臭蒼蠅

逐臭蒼蠅豈有爲。清蟬吟露最高奇。多藏苟得何名富。飽食嗟來未勝饑。窮寂不妨延壽考。貪狂總待算毫釐。首陽山翠千年在。好奠冰壺弔伯夷。

嵐似屏風

嵐似屏風草似茵。草邊時膾錦花鱗。山中宰相陶宏景。谷口耕夫鄭子真。宦達到頭思野逸。才多未必笑清貧。君看東洛平泉宅。只有年年百卉春。

十里煙籠

十里煙籠一徑分。故人迢遞久離羣。白雲明月皆由我。碧水青山可贈君。浮世宦名渾似夢。半生勤苦謾爲文。北邙坡上清松下。盡是鏘金佩玉墳。

古往今來

古往今來恨莫窮。不如沈醉臥春風。雀兒無角長穿屋。鸚鵡能言卻入籠。柳惠豈嫌居下位。朱雲直去拍三公。閒思郭令長安宅。草沒匡牆舊事空。

日月無情

日月無情也有情。期昇夕沒照均平。雖催前代英雄死。還促後來賢聖生。三尺靈烏金借耀。一輪飛鏡水饒清。憑誰築斷東溟路。龍影蟾光免運行。

詠寫真

寫得哀容似十全。閒開僧舍靜時懸。瘦于南國從軍日。老卻東堂射策年。潭底看身寧有異。鏡中引影更無偏。借將前輩真儀比。未愧金鑾李謫仙。

失題

擷月耕煙水國春。薄徒應笑作農人。皇王尙法三推禮。白社寧忘四體勤。雨灑蓑衣芳草暗。烏啼雲樹小村貧。猶勝墮力求餐者。五斗低腰走世塵。

客廳

稀卻松筠致客堂。淨泥環堵貯荷香。衡茅只要免風雨。藻稅不須高棟梁。豐蔀仲尼時演易。作歌五子恨雕牆。燕臺漢閣王侯事。青史千年播耿光。

苑亭

鴛瓦虹梁計已疎。織茅編竹稱貧居。剪平恰似山僧笠。掃淨真同道者廬。秋晚捲簾看過雁。月明憑檻數跳魚。重門公子應相笑。四壁風霜老讀書。

新葺茅屋二首

剪竹誅茆就水濱。靜中還得保天真。只聞神鬼害盈滿。不見古今爭賤貧。樹影便爲廊廡屋。草香權當綺羅茵。塔前一片泓澄水。借與汀禽活紫鱗。耨水耕山息故林。壯圖嘉話負前心。素絲髻上分愁色。絡緯床頭和苦吟。筆硯不才當付火。方書多誑罷燒金。同年二十八君子。遊楚遊秦斷好音。

新屋

耳順何爲土木勤。叔孫牆屋有前聞。縱然一世如紅葉。猶得十年吟白雲。性逸且圖稱野客。才難非敢傲明君。清甜數尺沙泉井。平與鄰家晝夜分。

北園

北園乾葉旋空枝。蘭蕙還將衆草衰。籠鳥上天猶有待。病龍興雨豈無期。身閒不厭頻來客。年老偏憐最。小兒生事罷來名。與利一窗書策是年支。

門外閒田數畝長有泉源築直堤分爲兩沼

左右澄瀾小檻前。直堤高築古平川。十分春水雙簷影。一片秋空兩月懸。前岸好山搖細浪。夾門嘉樹合晴煙。坐來暗起江湖思。速問溪翁買釣船。

全五代詩卷八十一

閩

徐 夔二

溫陵卽事

早年師友教爲文，賣卻漁舟網典墳。國有安危期日諫，家無擔石暫從軍。非才豈合攀丹桂，多病猶堪伴白雲。爭得千鍾季孫粟，滄洲歸與故人分。

山中寓居

高臥東鄰最上方，水聲山翠剔愁腸。白雲送雨籠僧閣，黃葉隨風入客堂。終去四明成大道，暫從雙鬢許秋霜。披緇學佛應無分，鶴氅談空亦不妨。

東歸題屋壁

塵埃歸去五湖東，還是衡門一畝宮。舊業旋從征賦失，故人多逐亂離空。因悲盡室如懸磬，卻擬攜家學轉蓬。見說高宗天上夢，無情曾與傅巖通。

郊村獨遊

歲閏堪憐歷候遲，出門惟與野雲期。驚魚擲上綠荷菱，棲鳥啄餘紅荔枝。末路可能長薄命，修途應合有

良時市頭相者休相戲。蹙膝先生半自知。

東京次新安道中

賦去兵來歲月長。野蒿空滿壞牆匡。旋從古轍成深谷。幾見金輿過上陽。洛水送年催代謝。嵩山擎日拂穹蒼。殊時異世爲儒者。不見文皇與武皇。

西華

五千仞有餘神秀。一一排雲上泱泱。疊障出關分二陝。殘岡過水作中條。巨靈廟破生春草。毛女峰高入絳霄。拜祝金天乞陰德。爲民求主降神堯。

將入城靈口道中作

路上長安惟咫尺。灞陵西望接秦原。依稀日下分天闕。隱映雲邊是國門。錦袖臂鷹河北客。青桑鳴雉渭南村。高風九萬程途遠。輿報滄洲欲化鯤。

長安述懷

黃河冰合尙來遊。知命知時肯躁求。詞賦有名堪自負。春風落第不曾羞。風塵色裏凋雙鬢。鼙鼓聲中歷幾州。十載公卿早言屈。何須課夏更冥搜。

義通里寓居卽事

家住寒梅翠嶺東。長安時節詠途窮。牡丹窠小春餘雨。楊柳絲疎夏足風。愁鬢已還年紀白。衰容寧藉酒

杯紅長卿甚有凌雲作。誰與清吟送帝宮。

寺中偶題

聽話金仙白相毫。每來皆得解塵勞。鶴棲雲路看方貴。僧倚松門見始高。名利罷燒心內火。雪霜偏垢髮邊毛。銀蟾未出金烏在。更上晴樓眺海濤。

西寨寓居二首

閒讀南華對酒杯。醉攜筇竹畫蒼苔。豪門有利人爭去。陋巷無權客不來。解報可能醫病雀。重燃誰肯照寒灰。嚴陵萬古清風在。好棹清溪詠釣臺。功智爭馳淡薄空。猶懷忠信擬何從。鷓鴣啄病疑雛鳳。神鬼欺貧笑伯龍。烈日不融雙鬢雪。病身全仰一枝筇。崇侯入輔嚴陵退。堪憶啼猿萬仞峰。

寄僧寓題

佛頂抄經憶惠休。衆人皆謂我悠悠。浮生真箇醉中夢。閒事莫添身外愁。百歲付於花暗落。四時隨卻水奔流。安眠靜笑思何報。日夜焚修祝郡侯。

醉題邑宰南塘屋壁

萬古清淮碧繞環。黃河濁浪不相關。縣留東道三千客。宅鎖南塘一片山。草色淨經秋雨綠。燒痕寒入曉窗斑。閩王美錦求賢製。未許陶公解印還。

題泗州塔

十年前事已悠哉。旋被鐘聲早暮催。明月似師生又沒。白雲如客去還來。煙籠瑞閣僧經靜。風打虛窗佛幌開。惟有南邊山色在。重重依舊上高臺。

遊靈隱天竺二寺

丹井冷泉虛易到。兩山真界實難名。石和雲霧蓮華氣。月過樓臺桂子清。騰踏迴橋巡像設。羅穿曲洞出龍城。更憐童子呼猿去。颯颯蕭蕭下樹行。

塔院小屋四壁皆是卿相題名因成四韻

雁塔纔空映九衢。每看華宇每踟蹰。題名盡是台衡迹。滿壁堪爲宰輔圖。鸞鳳豈巢荆棘樹。虬龍多蟄帝王都。誰知遠客思歸夢。夜夜無船自過湖。

題福州天王閣

絕境宜棲獨角仙。金張到此亦忘還。三門裏面千層閣。萬井中心一朵山。江拗碧灣盤洞府。石排青壁護禪關。有時海上看明月。展出冰輪疊浪間。

春入鯉湖

到來峭壁白雲齊。載酒春遊渡九溪。鐵嶂有樓靈欲墮。石門無鎖路還迷。湖頭鯉去轟雷在。樹杪猿呼落日低。回首浮生真幻夢。何如斯地傍幽棲。

放榜日

喧喧車馬欲朝天。人探東堂榜已懸。萬里便隨金鷺鷥。三台仍借玉連錢。南海相公。此時在京。蒙借鞍馬人僕。花浮酒影彤霞爛。日照袍光瑞色鮮。十二街前樓閣上。捲簾誰不看神仙。

長安卽事三首

拋擲清溪舊釣鈎。長安寒暑再環周。便隨鷺羽三春化。只說蟬聲一度愁。掃雪自憐窗紙照。上天寧愧海槎流。明時側待金門詔。肯羨班超萬戶侯。
無酒窮愁結自舒。飲河求滿不求餘。身登霄漢平時策。家得干戈定後書。富貴敢期蘇季子。清貧方見馬相如。明時用卽匡君去。不用何妨卻釣魚。
拖紫腰金不要論。便堪歸隱白雲村。更無名籍強金榜。豈有花枝勝杏園。綺席促時皆國器。羽觥飛處盡王孫。高眠亦是前賢事。爭報春闈莫大恩。

憶潼關

洞壑雙扉入到初。似從深窅覩高墟。天開白日臨軍國。山夾黃河護帝居。隋煬遠遊宜不反。奉春長策竟何如。須知皇漢能局誦。延得年過四百餘。

憶潼關早行

行客起看仙人掌。落星斜照濁河泥。故山遠處高飛雁。去馬鳴時先早雞。關柳不知誰氏種。岳碑猶見聖君題。葛藟十軸僅三尺。豈謂青雲便有梯。

憶長安行

舊歷關中憶廢興。僭奢順戒儉順憑。火光只是燒秦冢。賊眼何曾視灞陵。鐘鼓煎催人自急。侯王更換恨難勝。不如坐釣清溪月。心共寒潭一片澄。

憶長安上省年

忽憶關中逐計車。歷坊騎馬信空虛。三秋病起見新雁。八月夜長思舊居。宗伯帳前曾獻賦。相君門下再投書。如今說着猶堪泣。兩宿都堂過歲除。

憶山中友

憶得當年接善鄰。苦將閒事強夫君。鬪開碧沼分明月。各領青山占白雲。近日藥方多繕寫。舊來詩草半燒焚。金門幾欲言西上。惆悵關河正用軍。

憶薦福寺南院

憶昔長安落第春。佛宮南院獨遊頻。燈前不動惟金像。壁上曾題盡古人。鷓鴣聲中雙闕雨。牡丹花際六街塵。啼猿溪上將歸去。合問昇平詣秉鈞。

憶舊山

澗竹岩雲有舊期。二年頻長鬢邊絲。遊魚不愛金杯水。棲鳥敢求瓊樹枝。陶景戀深松檜隱。留侯拋卻帝王師。龍爭虎攫皆閒事。數疊山光在夢思。

曲江宴日呈諸同年

鷓鴣驚與鳳凰同。忽向中興遇至公。金榜連名昇碧落。紫花封勅出瓊宮。天知惜日遲遲暮。春爲催花旋旋紅。好是慈恩題了望。白雲飛盡塔連空。

獻內翰楊侍郎

箇開青瑣見瑤臺。冷拂星辰逼上台。丹鳳詔成中使取。白龍香近聖君來。欲言溫暑三緘口。閒賦宮詞八斗才。莫擬吟雲避榮貴。廟堂玉鉉待鹽梅。

輦下贈屯田何員外

封章頻得帝咨嗟。報國惟將直破邪。身到西山書幾達。宮登南省鬢初華。廚非寒食還無火。菊待重陽擬泛茶。內翰好才兼好古。秋來應數訪君家。

贈垂光同年

丹桂攀來十七春。如今始見茜袍新。須知紅杏園中客。終作金鑾殿裏臣。逸少家風惟筆札。元成世業是陶鈞。他時黃閣朝元處。莫忘同年射策人。

尚書榮拜恩命蚤疾中輒課小詩二首以申攀讚

明公家鑿鳳凰池。弱冠封侯四海推。富貴有期天授早。關河多難勅來遲。昂星人傑當王佐。黃石仙翁識帝師。昨日詔書猶漏缺。未言商也最能詩。
東郊迎入紫泥封。此日天仙下九重。三五月明臨闕澤。百千人衆看王恭。旗傍綠樹遙分影。馬踏浮雲不見蹤。借問乘軺何處客。相庭雄幕卷芙蓉。

賀清源太保王延彬二首

蕊珠宮裏神仙謫。八載溫陵萬戶閒。心地闢於雲夢澤。官資高卻太行山。姜牙兆寄熊羆內。陶侃文成掌握間。應笑清溪舊門吏。年年扶病掩柴關。
武榮江畔祥雲蔭。寵拜天人慶郡人。五色鶴綾花上敕。九霄龍尾道邊臣。英雄遠處誰言命。富貴來時自逼身。更待春風飛吉語。紫泥分付與陶鈞。

府主僕射王搏生日

光化三年己未八月獻

熊羆先兆慶垂休。天地氤氳瑞氣浮。李樹影籠周柱史。昂星光照漢鄼侯。數鍾龜鶴千年算。律正乾坤八月秋。勳業定應歸鼎鼐。生靈豈獨化東甌。

喜雨上主人尙書

天皇攘袂勅神龍。雨我公田兆歲豐。幾日淋漓侵暮角。數宵滂沛徹晨鐘。細如春霧籠平野。猛似秋風擊

古松門下十年耕稼者。坐來偏憶翠微峰。

上盧三拾遺以言見黜

骨鯁如君道尚存。近來人事不須論。疾危必厭神明藥。心惑多嫌正直言。冷眼靜看真好笑。傾懷與說卻爲冤。因思周廟當時誠。金口三緘示後昆。

依韻贈嚴司直

曾轉雙蓬到玉京。宣尼恩奏樂卿名。歌殘白石扣牛角。賦換黃金愛馬卿。滄海二隅身漸老。太行千疊路難行。夫君才大官何小。堪恨人間事不平。

依韻酬常循州

早年花縣拜潘郎。尋忝飛鳴出桂堂。日走青天長似箭。人同紅樹幾經霜。帆分南浦知難別。駕在東川更可傷。公論一麾將塞詔。且隨徵令過瀟湘。

贈黃校書先輩璞間居

取得驪龍第四珠。退依僧寺卜貧居。青山入眼不干祿。白髮滿頭猶著書。東澗野泉添碧沼。南園夜雨長秋蔬。月明掃石吟詩坐。諱卻全無擔石儲。

贈表弟黃校書較

昔居平溪。今居近市。入市五里。

產破身窮爲學儒。我家諸表愛詩書。嚴陵雖說臨溪隱。晏子還聞近市居。佳句麗儉紅茵茗。吟窗冷落白蟾蜍。閒來共話無生理。今日悠悠事總虛。

贈楊著作

藻麗煒煌冠士林。白華榮養有曾參。十年去里荆門改。八歲能詩相座吟。李廣不侯身漸老。子山操賦恨何深。釣魚臺上頻相訪。共說長安淚滿襟。

渤海賓貢高元因。先輩閩中相訪云。本國人寫得蚤。斬蛇劍御溝水。人生幾何賦。皆以金書列爲屏。障因而有贈。

折桂何年下月中。閩山來問我雕蟲。肯銷金翠書屏上。誰把芻蕘過日東。郊子昔時遭孔聖。由余往日諷秦宮。嗟嗟六國金門士。幾個人能振素風。

贈月君

山妻字月君。伏見文選中。顧彥元亦有贈婦詞。因拈此詠。

出水蓮花比性靈。三生塵夢一時醒。神傳尊勝陀羅呪。佛授金剛般若經。懿德好書添女誠。素容堪畫上銀屏。鳴梭軋軋織纖手。窗戶光流織女星。

病中春日卽事寄主人尙書二首

身比秋荷覺漸枯。致君經國墮前圖。層冰照日猶能暖。病骨逢春卻未蘇。鏡裏白鬢擗又長。枝頭黃鳥靜

還呼。度樓恩化通神聖。何計能教擲得盧。
風拍衰肌久未蠲。破窗頻見月團圓。更無舊日陳人問。只有多情太守憐。臘內送將三折股。歲陰分與五
銖錢。元穹若假年齡在。願捧銅盤爲國賢。

溫陵殘臘書懷寄崔尙書

濟川無揖擬何爲。三傑還從漢祖推。心學庭槐空發火。鬢同門柳卽垂絲。中興未遇先懷策。除夜相催也
課詩。江上年年接君子。一杯春酒一枰棋。

寄華山司空表聖

金闕爭權競獻功。獨逃徵詔臥三峰。雞羣未必容同鶴。蛛網何由捕得龍。清論盡應書國史。靜籌皆可息
邊烽。風霜落滿千株木。不近青青澗底松。
非雲非鶴不從容。誰敢輕量傲世蹤。紫殿幾徵王佐業。青山未拆詔書封。閒吟每待秋空月。早起長先野
寺鐘。前古負才多爲國。滿懷經濟欲何從。

寄盧端公同年仁瓘時遷都洛陽新立幼主

上陽宮闕翠華歸。百辟傷心序漢儀。崑岳有炎瓊玉碎。洛川無竹鳳凰饑。須簪白筆匡明主。莫許黃瓜博
少師。惆悵宸居遠於日。長吁空摘髻邊絲。

寄天台陳希叟

陰山冰凍嘗迎夏。蟄戶雲雷只待春。呂望豈嫌垂釣老。西施不恨浣紗貧。坐爲羽獵車中相。飛作君王掌上身。拍手相思惟大笑。我曹寧比等閒人。

寄兩浙羅書記

進卻湮沈退卻升。錢塘風月過金陵。鴻才入貢無人換。白首從軍有詔徵。博簿集成時輩罵。讒書編就薄徒憎。憐君道在名長在。不到慈恩最上層。

邑宰相訪翼日有寄

淵明深念邴說貧。踏破莓苔看甌塵。碧沼共攀紅菡萏。金鞍不御紫麒麟。殘陽妬害催歸客。薄酒甘嘗罰主人。夜半夢醒追復想。欲長攀接有何因。

東歸出城留別知己

常蒙屈指許非才。三載長安共酒杯。欲別未攀楊柳贈。相留擬待牡丹開。寒隨御水波光散。暖逐衡陽雁影來。它日因書問衰颯。東溪須訪子陵臺。

送劉常侍

懷君何計更留連。忍送文星上碧天。杜預注通三十卷。漢皇枝紹幾千年。言端信義如明月。筆下篇章似湧泉。他日有書隨雁足。東溪無令訪漁船。

送盧拾遺歸華山

紫殿諫多防佞口。清秋假滿別明君。惟憂急詔歸青瑣。不得經時臥白雲。千載茯苓攜鶴鬪。一峰仙掌爲僧分。門前舊客期相薦。猶望飛書及主文。

送王校書往清源

南國賢侯待德風。長途仍借九花驄。清歌早貫驪龍額。丹桂曾攀玉兔宮。楊柳堤邊梅雨熟。鷓鴣聲裏麥田空。吟詩臺上如相問。與說礮溪直釣翁。

春末送陳先輩之清源

貧中惟是長年華。每羨君行自歎嗟。歸日捧持明月寶。去時期刻刺桐花。春風避雨多遊寺。曉騎聽雞早入衙。千乘侯王若相問。飛書與報白雲家。

岳州端午日送人遊郴連

五月巴陵值積陰。送君千里客于郴。北風吹雨黃梅落。西日過湖青草深。競渡岸傍人挂錦。採芳城上女遺簪。九嶷雲闕蒼梧暗。與說重華舊德音。

潘丞相舊宅

綠樹垂枝蔭四隣。春風還似舊時春。年年燕是雕梁主。處處花隨落月塵。七貴竟爲長逝客。五侯尋作不歸人。秋槐影薄蟬聲盡。休謂龍門待化鱗。

經過廣平員外舊宅

門巷蕭條引涕洟。遺孤三歲著麻衣。綠楊樹老垂絲短。翠竹林荒著筍稀。結社僧因秋朔弔。買書船近葬時歸。平生欲獻匡君策。抱病猶言未息機。

經過翰林楊左丞池亭

八角紅亭蔭綠池。一朝青草蓋遺基。薔薇藤老開花淺。翡翠巢空落羽奇。春榜幾深門下客。樂章多取集中詩。平生德義人間誦。身後何勞更立碑。

傷前翰林楊左丞贊圖

飛上黿頭侍玉皇。三台遺耀換餘光。人間搦管窮蒼頡。地下修文待卜商。貞魄肯隨金石化。真風留伴蕙蘭香。皇天未啓昇平運。不使伊臯相禹湯。

全五代詩卷八十二

閩

徐 夤三

讀史

亞父淒涼別楚營。天留三傑翼龍爭。高才無主不能用。直道有時方始平。喜溫子文何顯悟。卷藏蘧瑗甚分明。須知飲啄由天命。休問黃河早晚清。

魏

伐罪書勳令不常。爭教爲帝與爲王。十年小怨誅桓邵。一檄深讎怨孔璋。在井蟄龍如屈伏。食槽驕馬忽騰驤。奸雄事過分明見。英識空懷許子將。

蜀

雖倚關張敵萬夫。豈勝恩信作良圖。能均漢祚三分業。不負荊州六尺孤。綠水有魚賢已得。青桑如蓋瑞先符。君王幸得中山後。建國如何號蜀都。

兩晉

三世深謀啓帝基。可憐孀婦與孤兒。罪歸成濟皇天恨。戈犯明君萬古悲。巴蜀削平輕似紙。勾吳吞卻美

如飴。誰知高鼻能知數。競向中原簸戰旗。

宋二首

天爵休將儻石論。一身恭儉萬邦尊。賭將金帶驚寰海。留得耕衣誠子孫。締構不應饒漢祖。奸雄何足數。王敦草中求活非吾事。豈啻橫身向廟門。百萬人甘一擲輸。元穹惟與道相符。豈知紫殿新天子。只是丹徒舊嗇夫。五色龍章身早見。六終鴻業數難逾。三年未得分明夢。卻爲蘭陵起霸圖。

陳

三惑昏昏中紫宸。萬機拋卻醉臨春。書中不禮隋文帝。井底常攜張貴嬪。玉樹歌聲移入哭。金陵天子化爲臣。兵戈半渡前江水。狎客猶聞爭酒巡。

山陰故事

坦腹夫君不可逢。千年猶在播英風。紅鴉化鶴青天遠。綵筆成龍綠水空。愛竹只因憐直節。書裙多是爲奇童。吹笙綠嶺登仙後。東注清流豈有窮。

覽柳渾汀洲採白蘋之什因成

探盡汀蘋恨別離。鴛鴦鷺鷥總雙飛。月明南浦夢初斷。花落洞庭人未歸。天遠有書隨驛使。夜長無燭照寒機。年來泣淚知多少。重疊成痕在繡衣。

月

碧落誰分造化權。結霜凝雪作嬋娟。寒蟬若不開三穴。狡兔何從上九天。莫見團圓明處遠。須看彎曲鑿時偏。鄙詵樹老堯莫換。惆悵今年似去年。

新月

雲際嬋娟出。又藏美人腸。斷拜金方。嫦娥一隻眉先掃。織女三分鏡未光。珠箔寄鉤懸杏靄。白龍遺爪印穹蒼。更期十五圓明夜。與破陰霾照八荒。

雲

漠漠沈沈向夕暉。蒼梧巫峽兩相依。天心白日休空蔽。海上故山應自歸。似蓋好臨千乘載。如羅堪翦六銖衣。爲霖須救蒼生旱。莫向西郊作雨稀。

雨

引電隨龍密。又輕酒杯閒。喫得佳名。千山草木和雲暗。陸地波瀾接海平。灑竹幾添春睡重。滴簷偏遣夜愁生。陰妖冷孽成何怪。敢蔽高天日月明。

風

城上寒來思莫窮。土囊萍末兩難同。飄成遠浪江湖際。吹起暮塵京洛中。飛雪蕭條殘臘節。落花狼籍古行宮。春能和煦秋搖落。生殺還同造化功。

霞

天際何人濯錦歸。偏宜殘照與晨暉。流爲洞府千年酒。化作靈山幾襲衣。野燒燄連殊赫奕。愁雲陰隔乍依稀。勞生願學長生術。餐盡紅桃上漢飛。

露

鶴鳴先警雁來天。洗竹沾花處處鮮。散彩幾當蟬飲際。凝光宜對蚌胎前。朝垂苑草煙猶重。夜滴宮槐月正圓。恍恍與霜同降日。蘋蘩思薦獨淒然。

霜

應節誰窮造化端。菊黃豺祭問應難。紅窗透出鴛衾冷。白草飛時雁塞寒。露結芝蘭瓊屑厚。日乾葵藿粉痕殘。世間無比催搖落。松竹何人肯便看。

煙

燎野焚林見所同。惹空橫水展形容。能滋甘雨隨車潤。不並行雲逐客蹤。晴鳥迴籠嘉樹薄。春亭嬌幙好花濃。有時片片風吹去。海碧山青過幾重。

和尚書詠煙

無根無蒂結還融。曾觸嵐光徹底空。不散幾知離畢雨。欲飛須待落花風。玲瓏薄展鮫綃片。霧歷輕含鳳竹叢。瓊什捧來思舊隱。撲窗穿戶曉溟濛。

曉

水盡銅龍滴漸微。景陽鐘動夢魂飛。潼關雞唱促歸騎。金殿燭殘求御衣。窗下寒機猶自織。梁間棲燕欲雙飛。羲和晴聳扶桑轡。借與寰瀛看早暉。

夜

日墜虞淵燭影開。沈沈煙霧壓浮埃。剡川雪滿子猷去。漢殿月生王母來。簷挂蛛絲應漸織。風吹螢火不成灰。愁人莫道何時旦。自有鐘鳴漏滴催。

水

火性何如水性柔。西來東出幾時休。莫言通海能通漢。雖解浮舟也覆舟。湘浦暮沈堯女怨。汾河秋泛漢皇愁。洪波急湍歸何處。二月桃花滿眼流。

泉

非鑿非疏出洞門。源深流峻合還分。高成瀑布漱逋客。清入御溝朝聖君。迸滴幾山穿破石。迅飛層嶠噴開雲。舊齋一帶連松竹。明月窗前枕上聞。

東

紫氣天元出故關。大明光照九垓間。鯨山海上秦娥去。鱸膾江邊齊椽還。青帝郊坰平似砥。主人階級峻如山。蟠桃樹在煙濤水。解凍風高未得攀。

南

罩罩嘉魚憶此方。送君前浦恨難量。火山遠照蒼梧郡。銅柱高標碧海鄉。陸賈幾時來越島。三閩何日濯滄浪。鍾儀冠帶歸心阻。蝴蝶飛園萬草芳。

西

密雲郊外已回秋。日下崦嵫景懶收。秦帝城高堅似鐵。李斯書上曲如鉤。寧惟東岳凌天秀。更有長庚瞰曙流。見說山傍偏出將。犬戎降盡復何愁。

北

雪滿胡天日影微。李君降虜失良時。窮漠駕浪鷗鵬化。極海寄書鴻雁遲。□□□猶未啓。殘兵奔去杳難追。可憐燕谷花間晚。鄒律如何爲一吹。

淚

發事牽情不自由。偶然惆悵卽難收。已聞抱玉沾衣溼。見說迷途滿泪流。滴盡綺羅紅燭暗。墮殘粧閣曉花羞。世間何處偏留得。萬點分明湘水頭。

夢

月落燈前閉北堂。神魂交入杳冥鄉。文通毫管醒來異。武帝蘅蕪覺後香。傳說已徵賢可輔。周公不見恨何長。生松十八年方應。通塞人間豈合忙。

別

酒盡歌終問後期。泛萍浮梗不勝悲。東門疋馬夜歸處。南浦片帆飛去時。賦罷江淹吟更苦。詩成蘇武思何遲。可憐范陸分襟後。空折梅花寄所思。

愁

夜長偏覺漏聲遲。往往隨歌慘翠眉。黃葉落催砧杵日。子規啼被夢魂時。明妃去泣千行淚。蔡琰歸梳兩鬢絲。四皓入山招不得。無家歸客最堪欺。

恨

事與時違不自由。如燒如刺寸心頭。烏江項籍忍歸去。雁塞李陵長繫留。燕國飛霜將破夏。漢宮紈扇豈禁秋。須知入骨難銷處。莫比人間取次愁。

忙

雙競龍舟疾似風。一星毳子兩朋同。平吳破蜀三除裏。滅楚圖秦百戰中。春近杜鵑啼不斷。寒催歸雁去何窮。兵還失路旌旗亂。驚起紅塵似轉蓬。

閒

不管人間是與非。白雲流水自相依。一瓢挂樹傲時代。五柳種門吟落暉。江上翠娥遺佩去。岸邊紅袖採蓮歸。客星辭得漢光武。卻坐東江舊薜磯。

詠錢

多蓄多藏豈足論。有誰還議濟王孫。能於禍處翻爲福。解向讎家買得恩。幾怪鄧通難免餓。須知夷甫不
曾言。朝爭暮競歸何處。盡入權門與倖門。

尙書惠蠟面茶

武夷春暖月初圓。採摘新芽獻地仙。飛鶻印成香蠟片。啼猿溪走木蘭船。金槽和碾沈香末。冰碗輕涵翠
縷煙。分贈恩深知最異。晚鐘宜煮北山泉。

貢餘祕色茶盞

振碧融青瑞色新。陶成先得貢吾君。巧剏明月染春水。輕旋薄冰盛綠雲。古鏡破苔當席上。嫩荷涵露別
江濱。中山竹葉香初發。多病那堪中十分。

白酒兩瓶送崔侍御

雪化霜融好潑醅。滿壺冰凍向春開。求從白石洞中得。攜向百花岩畔來。幾夕露珠寒貝齒。一泓銀水冷
瓊杯。湖邊送與崔夫子。誰見稽山盡日頽。

謝主人惠綠酒白魚

早起鵲聲頻送喜。白魚芳酒寄來珍。馨香乍揭春風甕。撥刺初辭夜雨津。樽闕最宜澄桂酒。網疏殊未損
霜鱗。不曾垂釣兼親醞。堪愧金臺醉飽身。

詠筆二首

秦代將軍欲建功，截龍搜兔助英雄。用多誰念毛皆拔，拋卻更嫌心不中。史氏只因歸道直，江淹何獨偶靈通。班超握管不成事，投擲翻從萬里戎。

君子三歸擅一名，秋毫雖細握非輕。軍書羽檄教誰錄，帝命王言待我成。勢健豈饒淝水陣，鋒銛還學歷山耕。毛乾時有何人潤，盡把燒焚恨始平。

尙書新造花箋

濃染紅桃二月花，只看神筆縱龍蛇。淺澄秋水看雲母，碎擊輕苔間粉霞。寫賦好追陳后寵，題詩堪送竇滔家。使君卽入金鑾殿，夜直無非草白麻。

詠扇

爲發涼飈滿玉堂，每親襟袖便難忘。霜凝雪暗知何在，道契時來忽自揚。曾伴一樽臨小檻，幾遮殘日過迴廊。漢宮如有秋風起，誰信班妃淚數行。

溪上要一隻白簾扇，蓋頭垂釣去年就。節推侍御請之蒙惠，一柄紫花紋者雖則鱗華具在，紕薄不及清源所出。因就南郡陳常侍請之，遂成拙句。

難求珍篋過炎天，遠就金貂乞月圓。直在引風欹角枕，且圖遮日上漁船。但令織取無花篋，不用挑爲飲露蟬。莫道如今時較晚，也應留得到明年。

釣車

荻灣漁客巧粧成。種鑄銀星一點輕。拋過碧江鵲鵲岸。軋殘金井轆轤聲。軸磨駢角冰光滑。輪卷春絲水面平。把向嚴灘尋轍迹。漁臺基在帳難傾。

尙書筵中詠紅手帕

鶴綾三尺曉霞濃。送與東家二八容。羅帶繡裙輕好繫。藕絲紅縷細初縫。別來拭淚遮桃臉。行去包香墮粉胸。無事把將纏皓腕。爲君池上折芙蓉。

剪刀

寶持多用繡爲囊。雙日交加兩鬢霜。金匣掠平花翡翠。綠窗裁破錦鴛鴦。初裁連理枝猶短。誤綰同心帶不長。欲製縵袍先把看。質非紈綺愧鈿鋸。

詠燈

分影由來恨不同。綠窗孤館兩何窮。熒煌短焰長疑暗。零落殘花旋委空。幾處隔簾愁夜雨。誰家當戶怯秋風。莫言明滅無多事。曾比人生一世中。

燈花

點蠟燒殘卻勝裁。九華紅豔吐玫瑰。獨含冬夜寒光拆。不傍春風煖處開。難見只因能送喜。莫挑唯恐墜成灰。貪膏附熱多相誤。爲報飛蛾罷拂來。

帆

豈勞孤棹送行舟。輕過天涯勢未休。斷岸曉看殘月掛。遠灣寒背夕陽秋。川平直可追飛箭。風健還能泝急流。幸遇濟川恩不淺。北溟東海更何愁。

全五代詩卷八十三

閩

徐 夤 四

詠簾

素節輕盈透影勻。何人巧思間成文。閒隨別殿風應渡。半掩行宮麝欲熏。繡戶遠籠寒焰重。玉樓高挂曙
光分。無情幾恨黃昏月。纔到如鉤便墮雲。

紙帳

幾笑文園四壁空。碎寒深入剡藤中。誤懸謝守澄江練。自宿姮娥白兔宮。幾疊玉山開洞壑。半巖春霧結
房櫺。針羅截錦饒君侈。爭及蒙茸煖避風。

紙被

文采鴛鴦罷合歡。細柔輕綴好魚牋。一床明月蓋歸夢。數尺白雲籠冷眠。披對勁風溫勝酒。擁聽寒雨暖
於綿。赤眉豪客見皆笑。卻問儒生直幾錢。

梅花

瓊瑤初綻嶺頭葩。藥粉新粧姹女家。舉世更誰憐潔白。癡心皆盡愛緜華。元冥借與三冬景。謝氏輸他六

出花結實和羹知有日，肯隨羌笛落天涯。

牡丹花二首

看遍花無勝此花，翦雲披雪蘸丹砂。開當青律二三月，破卻長安千萬家。天縱穠華劌鄙吝，春教妖豔妬豪華。不隨寒令同時放，倍種雙松與辟邪。萬萬花中第一流，淺霞輕染嫩銀甌。能狂綺陌千金子，也惑朱門萬戶侯。朝日照開攜酒看，暮風吹落遶欄收。詩書滿架塵埃撲，盡日無人略舉頭。

尙書座上賦牡丹花得輕字其花自越中移植

流蘇凝作瑞華精，仙閣開時麗日晴。霜月冷銷銀燭焰，寶甌圓印綵雲英。嬌含嫩臉春粧薄，紅蘸香綃豔色輕。早晚有人天下去，寄他將贈董雙成。

依韻和尙書再贈牡丹花

爛銀基地薄紅粧，羞殺千花百卉芳。紫陌昔曾遊寺看，朱門今再遶欄望。龍分夜雨資嬌態，天與春風發好香。多着黃金何處買，輕橈挑過鏡湖光。

郡伯借牡丹花

腸斷東風落牡丹，爲祥爲瑞久留難。青春不駐堪垂淚，紅豔已空猶倚欄。積蘚不銷香藥盡，晴陽高照露華乾。明年萬葉千枝長，倍發芳菲借客看。

惜牡丹

今日狂風揭錦筵。預愁吹落夕陽天。閒看紅豔只須醉。謾惜黃金豈是賢。南國好偷誇粉黛。漢宮宜摘贈神仙。良時雖作鶯花主。白馬王孫恰少年。

憶牡丹

綠樹多和雪霰栽。長安一別十年來。王侯買得價偏重。桃李落殘花始開。宋玉隣邊腮正嫩。文君機上錦初裁。滄洲春暮空腸斷。畫看猶將勸酒杯。

追和白舍人詠白牡丹

蓓蕾抽開素練囊。瓊葩薰出白龍香。裁分楚女朝雲片。剪破姮娥夜月光。雪句豈須徵柳絮。粉腮應恨貼梅粧。檻邊幾笑東籬菊。冷折金風待降霜。

菊花

桓景登高事可尋。黃花開處綠畦深。消灾辟惡君須採。冷露寒霜我自禁。籬槿早榮還早謝。澗松同德復同心。陶公豈是居貧者。剩有東籬萬朵金。

司直巡官無諸移到玫瑰花

芳菲移自越王臺。最似薔薇好並栽。穠豔盡憐勝綵繪。嘉名誰贈作玫瑰。春成錦繡風吹拆。天染瓊瑤日照開。爲報朱衣早邀客。莫教零落委蒼苔。

松

澗底青松不染塵。未逢良匠競誰分。龍盤勁節巖前見。鶴唳翠梢天上聞。大廈可營誰擇木。女蘿相附欲凌雲。皇王自有增封日。修竹徒勞號此君。

畫松

澗底陰森驗筆精。筆間開展覺神清。曾當月照還無影。若許風吹合有聲。枝偃只應元鶴識。根深宜與茯苓生。天台道士頻來見。說似株株倚赤城。

柳

漠漠金條引線微。年年光翠報春歸。解籠飛靄延芳景。不逐亂花飄夕暉。啼鳥噪蟬堪悵望。舞煙搖水自因依。五株名顯陶家後。見說辭榮種者稀。

竹

翠染琅玕粉漸開。東南移得會稽栽。游絲挂處漁竿去。綠水夾時龍影來。風觸有聲含六律。露沾如洗絕浮埃。王猷舊宅無人到。抱卻清陰蓋綠苔。

筍鞭

筍竹巖邊剔翠苔。錦江波冷洗瓊瑰。纍纍節轉蒼龍骨。寸寸珠聯巨蚌胎。須向廣場驅駟駿。莫從閒處撻鷲駘。寧同晉帝環營日。拋賺中途後騎來。

荔枝二首

朱彈星九燦日光。綠瓊枝散小香囊。龍綃殼綻紅紋粟。魚目珠涵白膜漿。梅熟已過南嶺雨。橘酸空待洞庭霜。蠻山蹋曉和煙摘。拜捧金盤獻越王。
日日薰風捲瘴煙。南園珍果荔枝先。靈鴉啄破瓊津滴。寶氣盛來蚌腹圓。錦里只聞消醉渴。蕊宮惟合贈神仙。何人刺出猩猩血。深染羅紋遍殼鮮。

苔

印留麋鹿野禽蹤。岩壑漁磯幾處逢。金谷曉凝花影重。章華春映柳陰濃。石橋羽客遺前迹。陳閣才人沒舊容。歸去掃除塔砌下。蘚痕殘綠一重重。

萍

爲實隨流瑞色新。泛風縈草護遊鱗。密行碧水澄涵月。澁滯輕橈去採蘋。比物何名腰下劍。無根堪並鏡中身。平湖春渚知何限。撥破閒投獨鱸綸。

蒲

濯秀盤根在碧流。紫茵含露向晴抽。編爲細履隨君步。織作輕帆送客愁。疎葉稍爲投餌釣。密叢還得採蓮舟。鴛鴦瀾瀾多情甚。日日雙雙遶傍游。

草

廢苑荒堦伴綠苔。恩疎長信恨難開。姑蘇麋鹿應思食。楚澤王孫已不來。色嫩似將藍汁染。葉齊如把剪刀裁。燕昭沒後多卿士。千載流芳郭隗臺。

鶴

閨苑瑤臺歲月長。一歸華表好增傷。新聲乍警初零露。折羽閒飛幾片霜。要伴神仙歸碧落。豈隨龜雁往西塘。三山頂上無人處。瓊樹堪巢不死鄉。

鴻

行如兄弟影連空。春去秋來燕不同。紫塞別當寒露白。碧山飛入暮霞紅。宣王德美周詩內。蘇武書傳漢苑中。況解啣蘆避弓箭。一聲歸喚楚天風。

宮鶯

領得春光在帝家。早從深谷出煙霞。閒棲仙禁日邊柳。饑啄御園天上花。睨睨只宜陪閣鳳。間關多是問宮娃。可憐鸚鵡矜言語。長閉雕籠歲月賒。

鷹

害物傷生性豈馴。且宜籠罩待知人。惟擒燕雀啗腥血。卻笑鸞鳳啄翠筠。狡兔穴多非爾識。鳴鳩脰短罰君身。豪門不讀詩書者。走馬平原放玩頻。

鷓鴣

神化難源瑞卽開。雕陵毛羽出塵埃。香閨報喜行人至。碧漢填河織女回。明月解隨烏繞樹。青銅寧愧雀爲臺。瓊枝翠葉庭前植。從待翩翩去又來。

鷺

從待啣泥濺客衣。百禽靈性比他稀。何嫌何恨秋須去。無約無期春自歸。鷓鴣不容應自怪。棟梁堪庇願相依。吳王宮女嬌相襲。合整雙毛預奮飛。

雙鷺

雙鷺雕籠昨夜開。月明飛出立庭隈。但教綠水池塘在。自有碧天鴻雁來。清韻叫霜歸鳥樹。素翎遺雪落漁臺。何人爲我追尋得。重勸溪翁酒一杯。

鷓鴣

繡僕梅兼羽翼全。楚雞非瑞莫爭先。啼歸明月落邊樹。飛入百花深處煙。避燒幾曾遺遠岫。引雛時見飲晴川。荔枝初熟無人際。啄破紅苞墜野田。

尙書打毬小驄步驟最奇因贈

善價千金未可論。燕王新寄小龍孫。逐將白日馳清漢。啣得流星入畫門。步驟最能隨手轉。性靈多恐會人言。桃花雪點多雖貴。全假當場一顧恩。

郡侯坐上觀琉璃瓶中游魚

寶器一泓銀漢水。錦鱗纔動卽先知。似涵明月波寧隔。欲上輕冰律未移。薄霧罩來分咫尺。碧綃籠處較毫釐。文翁未得沈香餌。擬置金盤召左慈。

蝴蝶二首

縹緲青蟲脫殼微。不堪煙重雨霏霏。一枝穠豔留教住。幾處春風借與飛。防患每憂雞雀口。憐香偏遠綺羅衣。無情豈解關魂夢。莫信莊周說是非。
拂綠穿紅麗日長。一生心事住春光。最嫌神女來行雨。愛伴西施去採香。風定只應攢蕊粉。夜寒長是宿花房。鳴蟬性分殊迂闊。空解三秋噪夕陽。

蟬

寒鳴寧與衆蟲同。翼髻綏冠豈道窮。殼蛻已從今日化。聲愁何似去年中。朝催籬菊花開露。暮促槐庭葉墜風。從此最能驚賦客。計居何處轉飛蓬。

螢

月墜西樓夜影空。透簾穿幙達房櫺。流光堪在珠璣列。爲火不生榆柳中。一點通黃卷字。輕輕化出綠蕪叢。欲知應候何時節。六月初迎大暑風。

迴文二首

飛書一幅錦文迴。恨寫深情寄雁來。機上月殘香閣掩。樹梢煙淡綠窗開。霏霏雨罷歌終曲。漠漠雲深酒

滿杯歸日幾人行。問卜徽音想望倚高臺。
輕帆數點千峯碧。水接雲山四望遙。晴日海霞紅靄靄。曉天江樹綠迢迢。清波石眼泉當檻。小逕松門寺對橋。明月釣舟漁浦遠。傾山雪浪暗隨潮。

自詠十韻

只合滄洲釣與耕。忽依螢燭愧功成。未遊宦路叨卑宦。纔到名場得大名。梁苑二年陪衆客。溫陵十載佐雙旌。錢財盡是侯王惠。骨肉偕承里巷榮。拙賦偏聞鑄印賣。惡詩親見畫圖呈。使宅行賓回文八體詩圖兩面庚午秋使樓赴宴每一倒翻讀八韻

多栽桃李期春色。闊鑿池塘許月明。寒益衿裯饒美寢。出乘車馬免徒行。粗支菽粟防飢歉。薄有杯盤備送迎。僧俗共鄰棲隱樂。妻孥同愛水雲清。如今便死還甘分。莫更嫌他白髮生。

和尚書詠泉山瀑布十二韻

名齊火浣溢山椒。誰把驚虹挂一條。天外倚來秋水刃。海心飛上白龍綃。民田鑿斷雲根引。僧圃穿通竹影澆。噴石似煙輕漠漠。濺崖如雨冷瀟瀟。冰中蠶緒纏蒼壁。日裏虹精挂絳霄。寒漱綠陰仙桂老。碎流紅豔野桃夭。千尋練寫長年在。六出花開夏日消。急恐劃分青嶂骨。久應棚裂翠微腰。濯纓便可譏漁父。洗耳還宜傲帝堯。林際猿猱偏得飲。岸邊烏鵲擬爲橋。赤城未到詩先寄。廬阜曾遊夢已遙。數夜積霖聲更遠。郡樓欹枕聽良宵。

尚書會仙亭詠薔薇蚤坐中聯四韻晚歸緝所聯因成一篇

結綠根株翡翠莖。勾芒中夜刺猩猩。景陽粧赴嚴鐘出。楚峽神教暮雨情。躑躅豈能同日語。玫瑰方可一時呈。風吹嫩帶香苞展。露灑啼思淚點輕。阿母葦宮期索去。昭君榆塞闕齋行。蕙高恐礙含光燕。架穩宜棲報曙鶯。鬪日只憂燒密葉。映塔疑欲讓雙旌。含煙散纈佳人惜。落地遺鈿少妓爭。丹渥不因輸繡段。錢圓誰把買花聲。海棠若要分流品。秋菊春蘭兩恰平。

偶題二首

買骨須求騏驥骨。愛毛宜採鳳凰毛。鴛鴦燕雀堪何用。仍向人前價例高。賦就神都振大名。斬蛇功與樂天爭。歸來延壽溪頭坐。終日無人問一聲。

鏡中覽

晨起梳頭忽自悲。髻中親見數莖絲。從今休說龍泉劍。世上恩讎報已遲。

初夏戲作

長養薰風拂曉吹。漸開荷芰落薔薇。青蟲也學莊周夢。化作南園蛺蝶飛。

杏園

杏苑簫聲好醉鄉。春風嘉宴更無雙。憑誰爲謔穆天子。莫把瑤池並曲江。

楚國史

六國商於恨最多，良弓休縮劍休磨。君王不剪如簧舌，再得張儀欲奈何。
張儀

荆楚南來又北歸，分明舌在不應違。懷王本是無心者，籠得蒼鷹卻放飛。
讀漢記

布衣空手取中原，勁卒雄師不足論。楚國八千秦百萬，豁開胸臆一時吞。
李夫人二首

不望金輿到錦帷，人間樂極卽須悲。若言要識愁中貌，也似君恩日日衰。
招得香魂爵少翁，九華燈燭曉還空。漢王不及吳王樂，且與西施死處同。

明妃

不用牽心恨畫工，帝家無策及邊戎。香魂若得昇明月，夜夜還應照漢宮。

馬嵬

二百年來事遠聞，從龍誰解盡如雲。張均兄弟皆何在，卻是楊妃死報君。

依韻答黃校書

慈恩雁塔參差榜，杏苑鶯花次第遊。白日有愁猶可散，青山高臥況無愁。

依韻贈南安方處士五首

七貴五侯生肯退。利塵名網死當拋。黔婁寂寞嚴陵臥。借問何人與結交。
休把羸蹄踏雪霜。書成何處獻君王。嵩山好與浮邱約。三十六峯雲外鄉。
百萬僧中不爲僧。比君知道僅誰能。無家寄泊南安縣。六月門前也似冰。
兩鬢當春卻似秋。僻居誇近野僧樓。落花明月皆臨水。明月不流花自流。
晉楚忙忙起戰塵。龔黃門下有高人。一畦雲薤三株竹。席上先生未是貧。

寄華山司空侍郎

仙掌林中第一人。鶴書時或問眠雲。莫言疏野全無事。明月清風肯放君。

聞司空侍郎訃音

園綺生雖逢漢室。巢由死不謁堯階。八徵不起夫君沒後何人葬。合取夷齊隱處理。

傷進士謝庭皓

大順中以詞賦著名與賈不相上下也時號錦繡帷

獻書猶未達明君。何事先遊岱岳雲。惟有春風護冤魄。與生青草蓋孤墳。

追和賈浪仙古鏡

誰聞黃帝橋山塚。明月飛光出九泉。狼籍薜痕磨不盡。黑雲殘點汙秋天。

新刺機

素手春溪罷浣紗，巧裁明月半彎斜。齊宮合贈東昏寵，好步黃金菡萏花。

大夫松

五樹旌封許歲寒，挽柯攀葉也無端。爭如澗底凌霜節，不受秦王號此官。

薔薇

朝露酒時如濯錦，晚風飄處似遺鈿。重門剩著黃金鑲，莫被飛瓊摘上天。

蕉葉

綠綺新裁織女機，擺風搖日影離披。只應青帝行春罷，閒倚東牆卓翠旗。

路傍草

楚甸秦原萬里平，誰教根向路傍生。輕蹄繡轂長相踢，合是榮時不得榮。

猿

宿有喬林飲一溪，生來蹤跡遠塵泥。不知心更愁何事，每向深山夜夜啼。

蝴蝶三首

不並難飛繭裏蛾，有花芳處定經過。天風相送輕飄去，卻笑蜘蛛漫織羅。
萼萼雙雙拂畫欄，佳人偷眼再三看。莫欺翼短飛長近，試就花間捉也難。
栩栩無因繫得他，野園荒徑一何多。不聞絲竹誰教舞，應仗流鶯爲唱歌。

全五代詩卷八十四

閩

黃滔

滔字文江，莆田人。昭宗乾寧二年擢進士第。光化中，除四門博士，尋遷監察御史，裏行充威武軍節度推官。王審知據有全閩，而終其身爲節將者，滔規正有力焉。著有泉山秀句集。

十國春秋中州名上

避地來閩，若韓偓、李洵輩，悉主于滔。滔文詞瞻蔚典則，詩清淳丰潤，有貞元長慶風。馬嵬、館娃、景陽、水殿諸賦，雖新倚永，稱一時絕調。天祐中，翁承贊使閩，賜金紫，以行易其居處。曰：文秀亭。光賢閣、畫錦堂。黃滔爲詩榮之。有建水閩山無故事，長卿殿助是前身之句。楊誠齋云：詩至晚唐益工。滔詩如寺寒三伏雨，松偃數朝枝，如青山寒帶雨，古木夜啼猿，又如聞雁之一聲初觸夢，半白已侵頭，與韓致光、吳融輩並游。未知孰先。洪邁云：滔詩清淳丰潤，如與人對話，和氣郁郁。胡震亨云：滔有別撰泉山秀句三十卷，皆閩士詩，惜尋訪未得。

長安書事

終不離青山，誰道雲無心。卻是白雲士，有時出中林。昨日擎紫泥，明日要黃金。炎夏羣木死，北海驚波深。伏蒲無一言，草疏賀德音。

寄友人

君愛桃李花。桃李花易飄。妾憐松柏色。松柏色難凋。當年識君初。指期非一朝。今晨見君意。日暮何蕭條。入門有勢利。孰能無囂囂。

寓言

流年五十前。朝朝倚少年。流年五十後。日日侵皓首。非通非介人。誰論四十九。賢哉蘧伯玉。清風獨不朽。落花

落花辭高樹。最是愁人處。一一旋成泥。日暮有風雨。不如沙上蓬。根斷隨長風。飄然與道俱。無情任西東。閨怨

妾家五嶺南。君戍三城北。雁來雖有書。衡陽越不得。別久情易料。豈在窺翰墨。塞上無烟花。寧思妾顏色。賈客

大舟有深別。滄海無淺波。利深波也深。君意竟如何。鯨鯢齒上路。何如少經過。

寄徐正字叡

八月月如冰。登樓見姑射。美人隔千里。想思無羽駕。紅蘭囊露衰。誰似流光訝。何當詩一句。同吟祝元化。

喜翁文堯員外病起

衛玠羊車懸。長卿駟馬姿。天嫌太端正。神乃滅風儀。飲冰俾消渴。斷穀皆清羸。越僧誇艾炷。秦女隔花枝。

自能論若器。

詩見潤州
和尚碑

不假求良醫。驚殺漳濱鬼。錯與劉生隨。昨日已如虎。今朝謁荀池。揚鞭入王門。四面

人熙熙。青桂仍霜霰。尺璧無瑕疵。迴塵卻惆悵。歸闕難遲遲。

送僧歸北巖寺

北巖泉石清。本自高僧住。新松五十年。藤蘿成古樹。題詩昔佳士。

酒表丈從叔。有名於當時。
兼西明薛博士。俱曾題詩。

清風二林喻。上智

失叩關。多被浮名誤。蓮局歷月澗。空美黃金布。江翻島嶼沈。木落樓臺露。伊余東還際。每起烟霞慕。旋爲
儉府招。未得窮野步。西軒白雲閣。師辭洞庭寓。越城今送歸。心到焚香處。

秋夕貧居

聽歌桂席闌。下馬槐烟裏。豪門腐梁肉。窮巷思糠粃。孤燈照獨吟。半壁秋花死。遲明亦如晦。雞唱徒爲爾。
書懷寄友人

此生如孤燈。素心挑易盡。不及如頑石。非與磨礱近。常思楊子雲。五藏曾離身。寂寞一生中。千載空清芬。

上李補闕

十洲非暫別。龍尾肯慵登。諫草封山藥。朝衣施衲僧。月留江客待。句歷釣船徵。終恐林棲去。飡霞葉上昇。
敷水盧校書

九霄無詔下。何事近清塵。宅帶松蘿僻。日唯猿鳥親。吟高仙掌月。期有洞庭人。莫問烟霞句。懸知見岳神。

寄邊上從事

斜日下孤城。長吟出點兵。羽書和客卷。邊思雜詩情。朔雪定鴻翼。西風嚴角聲。吟餘多獨坐。沙月對樓生。

寄鄭縣李侍御

古縣新烟火。東西入客詩。靜長如假一作如
長暇。日貧更甚閑時。僧借松蘿住。人將雨雪期。三年一官罷。嶽石

看成碑。

書崔少府居

一作贈
李補闕

魯史蜀琴旁。陶然舉一觴。夕陽明島嶼。秋水淺池塘。世亂憐官替。家貧值歲荒。前峯亦曾宿。知有辟寒方。

寄漢上友人

襄漢多清景。東遊已不能。蒹葭照流水。風雨撲孤燈。獻賦聞新雁。思山見去僧。知君北來日。惆悵亦難勝。

書懷

退耕逢歉歲。逐貢愧行朝。道在愁雖淺。吟勞鬢欲凋。破村虹入井。孤館客投魍。誰怕秋風起。聽蟬度渭橋。

秋辭江南

灞陵橋上路。難負一年期。積雨鴻來夜。重江客去時。勞生多故疾。漸老少新知。惆悵都堂內。無門雪滯遺。

退居

老歸江上村。孤寂欲何言。世亂時人物。家貧後子孫。青山寒帶雨。古木夜啼猿。惆悵西川舉。戎裝度劍門。

遊東林寺

平生愛山水。下馬虎溪時。已到終嫌晚。重遊預作期。寺寒三伏雨。松偃數朝枝。翻譯如曾見。白蓮開舊池。

寄李校書遊簡寂觀

古觀雲溪上。孤懷永夜中。梧桐四更雨。山木一庭風。詩得如何句。仙遊最勝宮。卻愁逢羽客。相與入煙空。

旅懷

蕭颯聞風葉。驚時不自堪。宦名中夜切。人事長年諳。古畫僧留與。新知客遇談。鄉心隨去雁。一一到江南。

冬暮山舍喜標上人見訪

寂寞三冬杪。深居業盡拋。逕松開雪後。砌竹忽僧敲。茗汲冰銷溜。鑪燒鵲去巢。共談情僻意。微日下林梢。

關中言懷

三秦五嶺意。不得不依然。跡寓枯槐曲。業蕪芳草川。花當落第眼。雨暗出城天。層閣浮雲外。何人動管絃。

書事

望歲心空切。耕夫盡把弓。千家數人在。一稅十年空。沒陣風沙黑。燒城水陸紅。飛章奏西蜀。明詔與殊功。

送李山人往湘中

漢渚往湘川。乘流入遠天。新秋無岸水。明月有琴船。露坐應通曉。萍居恐隔年。嶽峯千萬仞。知上嘯猿巔。

貽林鐸

終被春闈屈。低回至白頭。寄家僧許嶽。釣浦雨移洲。戰士曾憐善。豪門不信愁。王孫草還綠。何處擬羈遊。

入關旅次言懷

寸心唯自切。上國與誰期。月晦時風雨。秋深日別離。使休終未肯。已苦不能疑。獨媿商山路。千年四皓祠。

寄林寬

相知四十年。故國與長安。俱喜今辰在。休論往歲難。海鳴秋日黑。山直夏風寒。終始前儒道。昇沈盡一般。

送友人遊邊

銜杯國門外。分手見殘陽。何日還南越。今朝往北荒。砂城經雨壞。虜騎入秋狂。親詠關山月。歸吟鬢的霜。

下第出京

還失禮官求。花時出雍州。一生爲遠客。幾處未曾遊。故疾江南雨。單衣薊北秋。茫茫數年事。今日淚俱流。

送友人遊邊

虜酒不能濃。縱傾愁亦重。關河初落日。霜雪下窮冬。野燒枯蓬旋。沙風正馬衝。薊門無易過。千里斷人蹤。

一作遊子

莫從容

過商山

燕雁一來後，人人盡到關。如何衝臘雪，獨自過商山。羸馬高坡下，哀猿絕壁間。此心無處說，鬢向少年斑。

題道成上人院

花宮城郭內，師住亦清涼。何必天台寺，幽禪瀑布房。簾舒湘竹滑，茗煮蜀芽香。更看道高處，君侯題翠梁。

河梁

五原人走馬，昨夜到京師。繡戶新夫婦，河梁生別離。隴花開不豔，羌笛靜猶悲。惆悵良哉輔，鏘鏘立鳳池。

貧居冬杪

數塞未求通，吾非學養蒙。窮居歲杪雨，孤坐夜深風。年長慙昭代，才微辱至公。還愁把春酒，雙淚污杯中。

貽張蠟

夢思非一日，攜手卻淒涼。詩見江南電，遊經塞北霜。驅車先五漏，把菊後重陽。惆悵天邊桂，誰教歲歲香。

寄湘中鄭明府

縣與白雲連，滄州況縣前。嶽僧同夜坐，江月看秋圓。琴拂莎庭石，茶擔乳洞泉。莫耽雲水興，疲俗待君痊。

題鄭山人居

履迹遍莓苔，幽枝間藥裁。枯杉槩雪朵，破牖觸風開。泉自孤峯落，人從諸洞來。終期宿清夜，斟酌說天台。

秋晚山居

爽氣遍搜空，難堪倚望中。孤煙愁落日，高木病西風。山寂樵聲出，露涼蟬思窮。此時塵外事，幽默幾人同。

遊山

洞門穿瀑布。塵世豈能通。曾有遊山客。來逢採藥翁。異花尋復失。幽逕躡還窮。擬作經宵計。風雷立滿空。

送翁拾遺

還家俄一作

赴闕。別思肯淒淒。山坐輶車看。詩持一作

諫筆題。天開中國大。地設四維低。拜舞吾君後。青

雲更有梯。

貽李山人

野步愛江濱。江僧得見頻。新文無古集。往事有清塵。松竹寒時雨。池塘處勝春。定應雲雨內。陶謝是前身。

送陳樵下第東歸

青山烹茗石。滄海寄家船。雖得重吟歷。終難任意眠。礧疎連寺柳。風爽徹城泉。送目紅蕉外。來期已杳然。

寄陳礧隱居

道經前輩許。名拔後時喧。虛左中興榜。無先北清尊。新文漢氏史。別墅謝公村。須到三徵處。堂堂謁帝關。

贈懷光上人

謝城還擁入。師以接人勞。過午休齋慣。離經吐論高。頂寒拳素髮。珠銳走紅條。終憶泉山寺。聽猿看海濤。

憶廬山舊遊

前年入廬嶽。數宿在靈溪。殘燭松堂掩。孤峯月狖啼。平生爲客老。勝境失雲棲。縱有重遊日。烟霞會恐迷。

別友人

莫恨東牆下。頻傷命不通。苦心如有感。他日自推公。雨夜扁舟發。花時別酒空。越山烟翠在。終媿臥雲翁。

陳侍御新居

幕客開新第。詞人遍有詩。山憐九仙近。石買太湖奇。樹勢想高日。地形誇得時。自然成避俗。休與白雲期。

寄從兄璞

縱徵終不起。相與避烟塵。待到中興日。同看上國春。新詩說人盡。舊宅落花頻。移覓深山住。啼猿作四隣。

寄友人山居

斷嶠滄江上。相思恨阻尋。高齋秋不掩。幾夜月當吟。落石有泉滴。盈庭無樹陰。茫茫名利內。何以拂塵襟。

上刑部盧員外

誰識在官意。開門樹色間。尋幽頻宿寺。乞假擬歸山。半白侵吟鬢。微紅見藥顏。不知琴月夜。幾客自同閒。

和友人酬寄

新發烟霞詠。高人得以傳。吟銷松際雨。冷咽石間泉。大國兵戈日。故鄉饑饉年。相逢江海上。寧免一潸然。

下第

昨夜孤燈下。闌干泣數行。辭家從早歲。落第在初場。青草湖田改。單車客路忙。何人立功業。新命到封王。

題友人山居

到君棲迹所。竹逕與衡門。亦在乾坤內。獨無塵俗喧。新泉浮石蘚。崩壁露松根。更說尋僧處。孤峯上嘯猿。

寄敷水盧校書

諫省垂清論。仙曹豈久臨。雖專良史業。未畏直臣心。路入丹霄近。家藏華嶽深。還如韓吏部。誰不望知音。

贈明州霍員外

惠化如施雨。鄰州亦可依。正衙無吏近。高會覺人稀。海日旗邊出。沙禽角外歸。四明多隱客。閑約到巖扉。

題友人山齋

疎竹漏斜暉。庭間陰復遺。句成苔石茗。吟弄雪窗碁。沙草泉經澀。林齋客集遲。西風虛見逼。未擬問京師。

題山居逸人

十畝餘蘆葦。新秋看雪霜。世人誰到此。塵念自應忘。斜日風收釣。深秋雨信梁。不知雙闕下。何以謂軒裳。

題王侍御宅內亭子

俗間塵外境。郭內宅中亭。或有人家創。還無蓮幕磬。石曾湖岸見。琴誤嶽樓聽。來客頻頻說。終須作畫屏。

贈友人

超達陶子性。留琴不設絃。覓句朝忘食。傾杯夜廢眠。愛月影爲伴。吟風聲自連。聽此鶯飛谷。心懷迷遠川。

晚春關中

忍歷東莊出。東風舞酒旗。百花無看處。三月到殘時。遊塞聞兵起。還吳值歲饑。定唯荒寺裏。坐與噪蟬期。
逢友人

彼此若飄蓬。二年何所從。帝都秋未入。江館夜相逢。瘴嶺行衝夏。邊沙住隔冬。旅愁論未盡。古寺叩晨鐘。
寄少常盧同年

官拜少常休。青羈換鹿裘。狂歌離樂府。醉夢到瀛洲。古器巖耕得。神方客謎留。清溪莫沈釣。王者或畋遊。
傷翁外甥

江頭去時路。歸客幾紛紛。獨在異鄉歿。苦爲慈母聞。青春成大夜。新雨壞孤墳。應作芝蘭出。泉臺月桂分。
寄獻梓潼山侯侍御

漢宮行廟略。簪笏落民間。直道三湘水。高情四皓山。賜衣僧脫去。奏表主批還。地得松蘿塢。泉通雨雪灣。
東門添故事。南省缺新班。有新命不起片石秋從露。幽窗夜不關。夢餘蟾隱映。吟次鳥綿蠻。可惜相如作。當時

事悉閑。自注云時常拾遺諫諍。

壬癸歲書情

故園招隱客。應便笑無成。謁帝逢移國。投文值用兵。孤松憐鶴在。疎柳惡蟬鳴。疋馬迷歸處。青雲失曩情。
江頭寒夜宿壠上。歉年耕冠蓋。新人物。漁樵舊弟兄。易生唯白髮。難立是浮名。惆悵灞橋路。秋風誰入行。

塞上

掘地破重城。燒山搜伏兵。金徽互鳴咽。玉笛自淒清。使發西都聳。塵空北嶽橫。長河涉有路。曠野宿無程。沙雨黃鸞嘯。轅門青草生。馬歸秦苑牧。人在虜雲耕。落日牛羊聚。秋風鼓角鳴。如何漢天子。青塚杏含情。

河南府試秋夕聞新雁

湘南飛去日。薊北乍驚秋。叫出隴雲夜。聞爲客子愁。一聲初觸夢。半白已侵頭。旅館移欹枕。江城起倚樓。餘燈依古壁。片月下滄洲。寂聽良宵徹。躊躇感歲流。

和吳學士對春雪獻韋令公次韻

春雪下盈空。翻疑臘未窮。連天寧認月。墮地屢兼風。忽誤邊沙上。應平火嶺中。林間妨走獸。雲際落飛鴻。梁苑還吟客。齊都省創宮。掩扉皆堦北。移律愧居東。書幌飄全溼。茶鑪入旋融。奔川半留滯。疊樹互玲瓏。出戶行瑤砌。開園見粉叢。高才興詠處。眞宰答殊功。

省試內出白鹿宣示百官

乾寧二年

上瑞何曾乏。毛羣表色難。推於五靈少。宣示百寮觀。形奪場駒潔。光交月兔寒。已馴瑤草別。孤立雪花團。戴豸慙端士。抽毫躍史官。貴臣歌詠日。皆作白麟看。

壺公山

古老相傳古仙姓陳名壺公於此山成道因而名焉

八面峯巒秀，孤高可偶然。數人遊頂上，滄海見東邊。不信無靈洞，相傳有古仙。橘如珠一作夏在池象月

垂穿。山頭有池而圓，兼橋樹朱實夏在。

髣髴嘗聞樂，峩巖半插天。山寒徹三伏，松偃出千年。樵牧時迷所，倉箱歲疊川。嚴祠

風雨管，怪木薜蘿纏。青草方中藥，蒼苔石裏錢。瓊津流乳竇，春色駐芝田。烏兔中時近，龍蛇蟄處臙。嘉名

光列土，秀氣產羣賢。瀑鏤瑤臺路，溪昇釣浦船。鼇頭擎恐沒，地軸壓應旋。蠲疾寒甘露，藏珍起瑞烟。畫工

飛夢寐，詩客寄林泉。掘地多雲母，緣霜欠木棉。井通鱷吐脈，僧隔虎棲禪。

山間有井通海，盈縮之候，貞元中有僧號法通，成通中有僧號宏播，於其絕頂

獨禪，行至降虎而法通，曾下山遇兩

虎爭，牛乃叱而隔之，分令各啖之。

危磴千尋拔，奇花四季鮮。鶴歸懸圃少，鳳下碧梧偏。桃易炎涼熟，茶推醉

醒煎。邨家蒙棗栗，俗骨爽猿蟬。谷語昇喬鳥，陂開共蒂蓮。落楓丹葉舞，新蕨紫芽拳。翠竹雕羌笛，懸藤煮

蜀牋。白雲長掩映，流水別潺湲。作賦前儒闕，冲虛南國先。省郎求牧看，野老葺齋眠。

潘郎中存實詩云：雙旌牧清源，吟看壺公翠。又歐陽

稚先輩，自刺史蘇君，書求泉山之爲畫

寺立興衰創，碑須一二鐫。清吟思卻隱，簪紱奈縈牽。

屏云：壺公之高，洛陽之深，夢想所思。

省試奉詔漲曲江池

以春字爲韻，時乾符二年。

地脈寒來淺，恩波住後新。引將諸派水，別貯大都春。幽咽疏通處，清冷進入辰。漸平連杏岸，旋闊映樓津。

沙沒迷行徑。洲寬恣躍鱗。願當舟楫便。一附濟川人。

題宣一僧正院

五級凌虛塔。三生落師髮。都僧雖有託。孤嶠遂無期。井邑焚香待。君侯減俸資。山衣隨疊破。萊骨逐年羸。茶取寒泉試。松於遠澗移。吾曹來頂手。不合不題詩。

省試一一吹竽

乾符二年

齊竽今歷試。真偽不難知。欲使聲聲別。須令箇箇吹。後先無錯雜。能否立參差。次第教單進。宮商乃異宜。凡音皆竄跡。至藝始呈奇。以此論文學。終憑一一窺。

明月照高樓

月滿長空朗。樓侵碧落橫。波文流藻井。桂魄拂雕楹。深窳羅紈薄。寒搜戶牖清。冰鋪梁燕噤。霜覆瓦松傾。卓午收全影。斜懸轉半明。佳人當此夕。多少別離情。

廣州試越基懷古

南越千年事。興懷一旦來。歌鐘非舊俗。烟月有層臺。北望人何在。東流水不回。吹窗風雜瘴。沾檻雨經梅。壯氣曾難揖。空名信可哀。不堪登覽處。花落與花開。

襄州試白雲歸帝鄉

杳杏復霏霏。應緣有所依。不言天路遠。終望帝鄉歸。高嶽和霜過。遙關帶月飛。漸憐雙闕近。寧恨衆山遠。陣觸銀河亂。光連粉署微。旅人隨計日。自笑比麻衣。

出關言懷

又乞書題出關西謁列侯。寄家僧許嶽。釣浦雨移洲。賣馬登長陸。沾衣逐勝遊。萊腸終日餒。霜鬢度年秋。詩苦無人愛。言公是世仇。卻憐庭際草。中有號忘憂。

按三四又見
貽林鐸詩

和王舍人崔補闕題天王寺

郭內青山寺。難論此崛奇。白雲生院落。流水下城池。石像雷霆啓。江沙鼎鼉期。嶽僧來坐夏。秦客會題詩。岡轉泉根滑。門升薜級危。紫微今日句。黃絹昔年碑。歇鶴松低閣。鳴蛩徑出籬。粉垣千堵束。金塔九層支。啼鳥笙簧韻。開花錦繡姿。清齋奔井邑。元髮剃熊羆。極浦征帆小。平蕪落日遲。風篁清卻暑。烟草綠無時。信士三公作。靈蹤四絕推。良遊如不宿。明月擬何之。

全五代詩卷八十五

閩

黃滔二

送林寬下第東歸

爲君惆悵惜離京。年少無人有屈名。積雪未開移發日。鳴蟬初急說來程。楚天去路過飛雁。灞岸歸塵觸鎖城。又得新詩幾章別。烟村竹迳海濤聲。

商山贈隱者

誰不相逢話息機。九重城裏自依依。蓬萊水淺有人說。商洛山高無客歸。數隻珍禽寒月在。千株古木熱時稀。西窗作夜鳴蛩盡。知夢芝翁起扣扉。

送二友遊湘中

千里楚江新雨晴。同征肯恨迹如萍。孤舟泊處聯詩句。八月中旬宿洞庭。爲客早悲煙草綠。移家晚失嶽峯青。今來無計相從去。歸日汀洲乞畫屏。

塞下

正馬蕭蕭去不前。平蕪千里見窮邊。關山色死秋深。一作深秋日鼓角聲沈霜重天。荒骨或銜殘鐵露。驚風時掠暮沙旋。隴頭冤氣無歸處。化作陰雲飛杳然。

閨怨

寸心杳與馬蹄隨。如蛻形容在錦帷。江上月明船發後。花間日暮信迴時。五陵夜作酬恩計。四塞秋爲破虜期。待到乘輶入門處。淚珠流盡玉顏衰。

寄蔣先輩

夫差宮苑悉蒼苔。攜客朝遊夜未回。塚上題詩蘇小見。江頭酌酒伍員來。秋風急處煙花落。明月中時水寺開。千載三吳有高跡。虎邱山翠益崔嵬。

辭相府

從漢至唐分五州。誰爲將相作諸侯。閩江似鏡正堪戀。秦客如蓬難久留。正馬忍辭藩屏去。小才寧副廟堂求。今朝拜別幡幢下。雙淚如珠滴不休。

寄羅郎中隱

休向中興雪至冤。錢塘江上看濤翻。三徵不起時賢議。九轉終成道者言。綠酒千杯腸已爛。新詩數首骨猶存。瑤蟾若使知人事。仙桂應遭蠹卻根。

江行遇王侍御

數年分散秦吳隔。暫泊官船浦柳中。新草軍書名更重。久辭山逕業應空。渡頭潮落將行客。天際風高未宿鴻。此日相逢魂合斷。賴君身事漸飛冲。

題陳山人居

猶自莓苔馬跡重。石嵌泉冷嬾移峯。空垂鳳食簷前竹。漫拔龍形澗底松。隔岸青山秋是寺。半牀明月夜聞鐘。誰能惆悵蟠溪事。今古悠悠不再逢。

送人明經及第東歸

十問九通離義牀。今時登第信非常。亦從南院看新榜。旋束春關歸故鄉。水到吳門方見海。樹侵閩嶺漸無霜。知君已塞平生願。日與交親醉幾場。

催妝

北府迎塵南郡來。莫將芳意更遲回。雖言天上光陰別。且被人間更漏催。烟樹迴垂連蒂杏。綵童交捧合歡杯。吹簫不是神仙曲。爭引秦娥下鳳臺。

寄楊贊圖學士

東堂第一領春風。時怪關西小驥慵。華表柱頭還有鶴。華歆名下別無龍。君恩鳳閣含毫數。詩景珠宮列肆供。今日江南駐舟處。莫言歸計爲雲峯。

遇羅員外袞

灞陵橋外駐征轅。此一分飛十六年。豸角戴時垂素髮。雞香合處隔青天。綺園難貯林棲意。班馬須持筆削權。可忘自初相識地。秋風明月客鄜延。

寄懷南北故人

秋風昨夜落芙蓉。一片離心到外區。南海浪高書墮水。北州城破客降胡。玉窗挑鳳佳人老。綺陌啼鶯碧樹枯。嶺上青嵐隴頭月。時通魂夢出來無。

別友人

已喜相逢又怨嗟。十年飄泊在京華。大朝多事還停舉。故國經荒未有家。烏帶夕陽投遠樹。人衝臘雪往邊沙。夢魂空繫瀟湘岸。煙水茫茫蘆葦花。

寄羅浮山道者二首

天際雙山壓海濱。天漫絕頂海漫根。時聞雷雨驚樵客。長有龍蛇護洞門。泉石暮含朱槿晝。煙霞冬閉木棉溫。林間學道如容我。今便辭他寵辱喧。

有人曾見洞中仙。纔到

一作見

人間便越年。金鼎藥成龍入海。玉函書發鶴歸天。樓開石脈千尋直。山拆鰲

嶼一半臚。誰到月明朝禮處。翠巖深鎖荔枝煙。

過分水嶺 一作許棠詩

隴山高共鳥行齊。瞰險盤空甚躡梯。雲勢崩騰故向背。水聲嗚咽若東西。風兼雨氣吹人面。石帶冰棱礙馬蹄。此去秦川無別路。隔崖窮谷卻難迷。

雁

楚岸花晴塞柳衰。年年南北去來期。江城日暮見飛處。旅館月明聞過時。萬里風霜休更恨。滿川煙草且須疑。洞庭雲水瀟湘雨。好把寒更一一知。

二月二日宴中貽同年封先輩渭

帝堯城裏日銜杯。每倚嵇康到玉頰。桂苑五更聽榜後。蓬山二月看花開。垂名入甲成龍去。列姓如丁作鶴來。同戴大恩何處報。永言交道契陳雷。

御試二首

昭宗乾寧二年。崔凝考定進士。張貽憲等二十五人。復命所司覆試。內出四題。乃曲直不相入賦。良弓獻問賦。詢於芻蕘詩。品物咸熙詩。趙觀文。陳榮。崔賞。崔仁寶等四人。并盧瞻。韋說。封渭。韋希震。張蠟。黃滔。盧鼎。王貞白。沈崧。

陳曉。李龜真等十一人。並與及第。其張貽憲。孫溥。李光序。李樞。李途等五人。且令落下。許後再舉。其崔瓌。蘇楷。杜承昭。鄭稼等四人。不令再舉。內一人盧贛稱疾不至。宣令昇入。又云華陰省親。其父渥進狀乞落下。故就試止二十四人也。

已表隋珠各自攜。更從瓊殿立丹梯。九華燈作三條燭。萬乘君懸四首題。靈鳳敢期翻雪羽。洞簫應或諷金闈。明朝莫惜場場醉。青桂新香有紫泥。

六曹三省列簪裾。丹詔宣來試士初。不是玉皇疑羽客。要教金榜帶天書。詞臣假筆題黃絹。宮女敲銅奏

子虛御目四篇酬九百。敢從燈下略躊躇。

宿李少府園林

一壺濁酒百家詩。住此園林守選期。深院月涼留客夜。

一作夜客

古杉風細似泉時。嘗頻異茗塵心淨。議罷名

山竹影移。明日綠苔渾掃後。石庭吟坐復容誰。

鍾陵故人

滕王閣下昔相逢。此地今難訪所從。唯愛金籠貯鸚鵡。誰能鐵柱鎖蛟龍。荆榛翠是錢神染。河嶽期須國士鍾。一筴鱸魚千古美。後人終少繼前蹤。

故山

支頤默省舊林泉。石徑茅堂到目前。衰碧鳴蛩莎有露。濃陰歇鹿竹無煙。水從井底通滄海。山在窗中倚遠天。何事蒼髯不歸去。燕昭臺上一年年。

塞上

塞門關外日光微。角怨單于雁駐飛。衝水路從冰解斷。踰城人到月明歸。燕山臘雪銷金甲。秦苑秋風脆錦衣。欲弔昭君倍惆悵。漢家甥舅竟相違。

送翁員外承贊

誰言吾黨命多奇。榮美如君歷數稀。衣錦還鄉翻是客。迴車謁帝卻爲歸。鳳旋北闕虛丹穴。星復南宮逼紫微。已分十旬無急詔。天涯相送只沾衣。

翁文堯員外擁冊禮之歸。一路有詩名。畫錦集先將寄示。因書五十六字。

六窠只佩諸侯印。爭比從天擁冊歸。一軸郢人歌處雪。兩重朱氏著來衣。閩山秀已鍾君盡。洛水波應灑我稀。明日陪塵迎駟馬。定淮齋沐看光輝。

下第東歸留辭刑部鄭郎中誠

去遠知己住遠親。欲發羸蹄進退頻。萬里家山歸養志。數年門館受恩身。鶯聲歷歷秦城曉。柳色依依灞水春。明日藍田關外路。連天風雨一行人。

關中言懷

事事朝朝委一樽。自知無復解趨奔。試期交後猶爲客。公道開時敢說冤。窮巷住來經積雨。故山歸去見荒村。舉頭盡到斷腸處。何必秋風江上猿。

旅懷

未喫金丹看十洲。乃將身世作仇讎。羈遊數地值兵亂。宿在孤城聞雨秋。東越雲山卻思隱。西秦霜霰苦頻留。他人折盡月中桂。惆悵當年江上鷗。

喜侯舍人蜀中新命三首

八都詞客湯喧然。誰解飛揚誥誓間。五色綵毫裁鳳詔。九重天子豁龍顏。巴山月在趨朝去。錦水烟生入閣還。謀及中興多少事。莫愁明月不收關。卻搜文學起吾唐。暫失都城亦未妨。錦里幸爲丹鳳闕。幕賓徵出紫微郎。來時走馬隨中使。到日援毫定外方。若以掌言看諫獵。相如從此並輝光。賈誼纔承宣室召。左思唯預祕書流。賦家達者無過此。翰苑今朝是獨遊。立被御爐烟氣逼。吟經棧閣雨聲秋。內人未識江淹筆。竟問當時不早求。

經安州感故鄭郎中二首

雲夢江頭見故城。人間四十載垂名。馬蹄踐處東風急。雞舌銷時北闕驚。嶽客出來尋古劍。野猿相聚叫孤瑩。騰身飛上鳳凰閣。惆悵終垂吾黨情。錦帳先生作牧州。干戈缺後見荒邱。兼無姓賈兒童在。空有還珠烟水樓。江句行人唵刻石。月腸是處象登樓。旅魂頻此歸來否。千載雲山屬一遊。

出京別崔學士

一從門館遍投文。旋忝恩知驟出羣。不道鶴雞殊羽翼。許依龍虎借風雲。命奇未便乘東律。言重終期雪北軍。欲逐飄蓬向歧路。數宵垂淚戀清芬。

寄越從事林嵩侍御

子虛詞賦動君王。誰不期君入對廳。莫戀兔園留看雪。已乘驄馬合凌霜。路歸天上行方別。道在人間久便香。應念都城舊吟客。十年蹤跡委滄浪。

長安書事

一年年課數千言。口祝心祠挈出門。孤進難時誰肯薦。主司通處不須論。頻秋入自邊城雪。昨日聽來嶺樹猿。若有水田過十畝。早應歸去荻江村。

旅懷寄友人

重疊愁腸只自知。苦于香蘂亂于絲。一船風雨兮襟處。千里烟波迴首時。故國田園經戰後。窮荒歲月逼秋期。鳴蟬似會悠揚意。陌上聲聲怨柳衰。

放榜日

吾唐取士最堪誇。仙榜標名出曙霞。白馬嘶風三十轡。朱門秉燭一千家。郗詵聯臂昇天路。宣聖飛章奏日華。歲歲人人來不得。曲江烟水杏園花。

新埜道中

埜堂如雪草如茵。光武城邊一水濱。越客歸遙春有雨。杜鵑啼苦夜無人。東堂歲去啣杯懶。南浦期來落淚頻。莫道還家不惆悵。蘇秦羈旅長卿貧。

酬俞鈞

鄉書一忝薦延恩。二紀三朝泣省門。雖忝立名經聖鑒。敢期興詠疊嘉言。莫論蟾月無梯接。大底龍津有浪翻。今日朝廷推草澤。佇君承詔出雲根。

寄同年崔學士

半因同醉杏花園。塵忝鴻鑪與鑄顏。已脫素衣酬素髮。敢持青桂愛青山。雖知珠樹懸天上。終賴銀河接世間。畢使海涯能拔宅。三秦二十四畿寰。

寄陳侍御

千年二相未全誇。猶闕闕城賀降麻。何必錦衣須太守。別無蓮幕勝王家。醴泉湧處休論水。黃菊開時獨是花。九級燕金滿尊酒。卻愁隨詔謁承華。

酬徐正字齋

已免蹉跎負歲華。敢辭霜鬢雪呈花。名從兩榜考昇第。官自三台追起家。正馬有期歸輦轂。故山無計戀桑麻。莫言蓬閣從容久。披處終知金在沙。

客舍秋晚夜懷故山

寥寥深巷客中居。況值窮秋百事疎。狐枕憶山千里外。破窗聽雨五更初。經年荒草侵幽逕。幾樹西風鎖弊廬。長繫寸心歸未得。起挑殘燭獨躊躇。

絳州鄭尚書

旌旗日日展東風。雲稼連山雪刃空。削竹已知垂鳳食。摘珠何必到龍宮。諫垣虛位期飛步。翰苑含毫待紀公。誰謂唐城諸父老。今時得見蜀文翁。

喜陳先輩嶠及第

今年春已到京華。天與吾曹雪怨嗟。甲乙中時公道復。朝廷看處主司誇。飛離海浪從燒尾。嚙卻金丹定易牙。不是駕前偏落羽。錦城爭得杏園花。

延福里居和林寬何紹餘酬寄

長說愁吟逆旅中。一庭深雪一牕風。眼前道路無心覓。象外烟霞有句通。幾度相留侵鼓散。頻聞會宿著僧同。高清未以干時廢。屬和因知興不窮。

贈宿松湯明府

溪上家家禮樂新。始知爲政異常倫。若非似水清無底。爭得如冰凜拂人。月狷聲和琴調咽。烟村景接柳條春。宦遊兼得逍遙趣。休憶三吳舊釣津。

送僧

纔年七歲便從師。猶說辭家學佛遲。新斷松蘿還不住。愛尋雲水擬何之。孤溪雪滿維舟夜。疊嶂猿啼過寺時。烏道瀧湫悉行後。豈將翻譯負心期。

贈鄭明府

庭羅衙吏眼看山。眞恐風流是謫仙。垂柳五株春姪姪。鳴琴一弄水潺湲。援毫斷獄登殊考。駐樂題詩得出聯。莫起陶潛折腰歎。才高位下始稱賢。

江州夜宴獻陳員外

多少歡娛簇眼前。潯陽江上夜開筵。數枝紅蠟啼香淚。兩面青娥折瑞蓮。清管徹時斟玉醕。碧籌回處擲金船。因知往歲樓中月。占得風流是偶然。

湘中贈張逸人

羽衣零落帽欹斜。不自孤峰卽海沙。曾爲蜀山成寓跡。又因湘水擬營家。鳴琴坐見燕鴻沒。曳履吟忘野迳賒。更愛扁舟宿寒夜。獨聽風雨過蘆花。

寓題

紛紛墨勅除官日。處處紅旗打賊時。竿底得璜猶未用。夢中吞鳥擬何爲。損生莫若攀丹桂。免俗無過詠紫芝。兩岸蘆花一江水。依前且把釣魚絲。

斷酒

未老先爲百病仍。醉杯無計接賓朋。免遭拽蓋郎君諛。還被簪花錄事憎。絲管合時思索馬。池塘晴後獨留僧。何因澆得離腸爛。南浦東門恨不勝。

南海幕和段先輩送韋侍御赴闕

樹色川光入暮秋。使車西發不勝愁。壁連標格驚分散。雪課篇章互唱酬。魏闕別當飛羽翼。燕臺獨且占風流。滿園歌管涼宵月。此後相思幾上樓。

寄南海黃尚書

五羊城下駐行車。此事如今八載餘。燕頰已知飛食肉。龍門獨自退爲魚。紅樓入夜笙歌合。白社驚秋草木疎。西望清光寄消息。萬重烟水一封書。

送人住蘇州觀其兄

闔閩城外越江頭。兩地烟濤一葉舟。到日荆枝應便茂。別時珠淚不須流。逆歡酒醒山當枕。詠古詩成月在樓。明日尊前若相問。爲言今訪赤松遊。

遊東林寺

長生猶自重無生。言讓仙祠佛寺成。碑折誰忘康樂制。山靈表得遠公名。松形入漢藤蘿短。僧語離經耳目清。莫怪遲遲不歸去。童年已夢遶林行。

賀清源僕射新命

雖言嵩嶽秀崔嵬。少降連枝命世才。南史兩榮唯百揆。東閩雙拜有三台。二天在頂家家詠。丹鳳銜書歲歲來。虛說古賢龍虎盛。誰攀荆樹上金臺。

浙幕李端公泛建溪

越城吳國結良姻。交發芙蓉幕內賓。自顧幽沈槐省跡。得陪清顯諫垣臣。分題曉並蘭舟遠。對坐宵聽月
狷頻。文愛延平津上過。一雙神劍是龍鱗。

貽宋評事

河陽城裏謝城中。入曳長裾出佩銅。燕國金臺無別客。陶家柳下有清風。數蹤篆隸書新得。一竈屯蒙火
細紅。時說三吳欲歸處。綠波洲渚紫蒲葦。

寓題

每憶家山卽涕零。定須歸老舊雲扃。銀河水到人間濁。丹桂枝垂月裏馨。霜雪不飛無翠竹。鯨鯢猶在有
青萍。三千九萬平生事。卻恨南華說北溟。

傷蔣校書德山

誰到雙溪溪岸傍。與招魂魄上蒼蒼。世間無樹勝青桂。隴上有花唯白楊。秦苑火然新賦在。越城山秀故
居荒。如何萬古雕龍手。獨是相如識漢皇。

酬楊學士

神仙簿上愧非夫。詔作疑丹兩入爐。詩裏幾曾吟芍藥。花中方得見菖蒲。陽春唱後應無曲。明月圓來別
是珠。莫下蓬山不迴首。東風猶擬重搏扶。

寄同年李侍郎龜正

石門南面淚浪浪。自此東西失帝鄉。崑璞要疑方卓絕。大鵬須息始開張。已歸天上趨雙闕。忽喜人間捧八行。莫道秋霜不滋物。菊花還借後時黃。

烏石村

往日江村今物華。一迴登覽一悲嗟。故人沒後城頭月。新鳥啼來壠上花。賣劍錢銷知絕俗。聞蟬思苦卽詩家。謝公古郡青山在。三尺孤墳撲海沙。

寄同年盧員外

聽盡鶯聲出雍州。秦吳烟月十經秋。龍門在地從人上。郎省連天須鶴遊。休戀一臺推妙絕。已經三字入精求。當年甲乙皆華顯。應念槐宮今雪頭。

寄同年封舍人渭

唐城接軫赴秦川。憂合懽離驟十年。龍領摘珠同泳海。鳳啣輝翰別升天。八行真跡雖收拾。四戶高扃奈隔懸。能使邱門終始雪。莫教華髮獨潛然。

奉和翁文堯十九員外中謝日蒙恩賜金紫之什

面蒙君賜自龍墀。誰是還鄉一襲衣。三品易懸鱗鬣赫。八絲展起綵章飛。蔓爲勝事垂千古。題作新詩啓七微。嚴助買臣精魄在。定因羞著昔年歸。

翁文堯員外捧金紫還鄉之命推發篇章將原交情遠爲嘉貺泊燕鴻陸犬楚水荆山又吐瓊瑤

逮之幽鄙雖湧泉思觸逸興皆虛而強韻押難非才頗媿輒茲酬和以質獎私

樽將盛事更無餘。還向橋邊看舊書。東越獨推生竹箭。北溟喜足貯鯤魚。兩迴誰解歸華表。午夜兼能薦子虛。須把頭冠彈盡日。憐君不與故人疎。

奉和翁文堯員外經過七林書堂見寄之什

朱旗引入昔茅堂。半日從容盡日忙。駟馬寶車行錫禮。金章紫綬帶天香。山從南國添煙翠。龍起東溟認夜光。定恐故園留不住。竹風松韻慢淒鏘。

奉酬翁文堯員外駐南臺見寄之什

人指南臺山與川。大驚喜氣異當年。花迎金冊非時拆。月對瓊杯此夜圓。我愛藏冰從夏結。君憐修竹到冬鮮。殷勤更抱鳴琴撫。爲憶秦兒識斷絃。

奉和翁文堯員外文秀光賢畫錦之什

鄉名里號一時新。乃覺台恩重萬鈞。建水閩山無故事。長卿嚴助是前身。清泉引入旁添潤。嘉樹移來別帶春。莫凭闌干剩留駐。內廷虛位待才臣。

文秀亭

雖言閩越繫生賢。誰是還家寵自天。山簡媿兼諸郡命。鄭元慙秉六經權。鳥行去沒孤煙樹。漁唱還從碧

島川。休說遲迴未能去。夜來新夢禁中泉。

光賢閣

君王而賜紫還鄉。金紫中推是甲裳。華構便將垂美號。故山重更發清光。水澄此日蘭宮鏡。樹憶當年柏
署霜。珍重朱欄兼翠栢。來來皆自讀書堂。書錦堂

奉酬翁文堯員外神泉之遊見寄嘉什

含雞假豸喜同遊。野外嘶風並紫騮。松竹迴尋青嶂寺。姓名題向白雲樓。泉源出石清消暑。僧語離經妙
破愁。爭奈愛山猶戀闕。古來能有幾人休。

輒吟七言四韻攀寄翁文堯拾遺

唐設高科表用文。吾曹誰作諫垣臣。甄山秀氣曠千古。鳳闕華恩鍾二人。起草便論天上事。如君不是世
間身。龍頭龍尾前年夢。今日須憐應若神。

投翰長趙侍御

禹門西面逐飄蓬。忽喜仙都得入蹤。賈氏許頻趨季虎。荀家因敢謁頭龍。手扶日月重輪起。數是乾坤正
氣鍾。五色筆驅神出沒。八花磚接帝從容。詩酬御製風騷古。論似人情鼎鼐濃。豈有地能先鳳掖。別無山
更勝鼇峰。攀鴻日淺魂飛越。爲鯉年深勢險喁。澤國雨荒三徑草。秦關雪折一枝筇。吹成暖景猶葭律。引
上纖蘿在嶽松。願向明朝薦幽滯。免教號泣觸登庸。

鄜時李相公

秦城擇日發征轅。齋戒來投節制尊。分虎名高初命相。攀龍迹下愧登門。夜聽謳詠銷塵夢。曉拜旌幢戰旅魂。華舍未開寧有礙。綵毫雖乏敢無言。生兼文武爲人傑。出應乾坤靜帝闈。計吐六奇誰敢敵。學窮三略不須論。功高馬卸黃金甲。臺迥賓權白玉樽。九穗嘉禾垂綺陌。四時甘雨帶雕軒。推恩每覺東溟淺。吹律能令北陸暄。青草連沙無血漲。黃榆鎖塞有鶯翻。笙歌合沓春風郭。雞犬連延碧岫邨。遊子不緣貪獻賦。永依棠樹託蓬根。

成名後呈同年

業詩攻賦薦鄉書。二紀如鴻歷九衢。待得至公搜草澤。如從平陸到蓬壺。雖慙錦鯉成穿額。忝獲驪龍不寐珠。蒙楚數款休下泣。師劉大喝已爲虛。人間灰管供紅杏。天上烟花應白榆。一字連鑣巡甲族。千般唱罪賞皇都。名推顏柳題金塔。飲自燕秦索玉姝。退媿單寒終預此。敢將恩嶽怠斯須。

投刑部裴郎中

兩榜牽驅別海涔。佗門不合覓知音。瞻恩雖隔雲雷賜。向主終知犬馬心。禮闈後人窺作鏡。廟堂前席待爲霖。已齊日月懸千古。肯誤風塵使陸沈。拜首敢將誠吐血。蛻形惟待諾如金。愁聞南院看期到。恐被東牆舊恨侵。緇化衣空難抵雪。黑銷頭盡不勝簪。數行淚裏依投志。直比滄溟未是深。

輦下寓題

對酒何曾醉。尋僧未覺閑。無人不惆悵。終日見南山。

寄題崔校書郊舍

一片寒塘水。尋常立鷺鷥。主人貧愛客。沽酒往吟詩。

秋思

碧嶂猿啼夜。新秋雨霽天。誰人愛明月。露坐洞庭船。

芳草

澤國多芳草。年年長自春。應從屈平後。更苦不歸人。

輦下書事

比闕新王業。東城入羽書。秋風滿林起。誰道有鱸魚。

入關言懷

背將踪跡向京師。出在先春入後時。落日灞橋飛雪裏。已聞南院有看期。

過長江

曾搜景象恐通神。地下還應有主人。若把長江比湘浦。離騷不合自靈均。

題靈峰僧院

繫馬松間不忍歸。數巡香茗一枰棋。擬登絕頂留人宿。猶待滄溟月滿時。

司馬長卿

一自梁園失意回。無人知有挾天才。漢宮不鎖陳皇后。誰肯量金買賦來。

歸思

蘄北風烟空漢月。湘南雲水半蠻邊。寒爲旅雁暖還去。秦越離家可十年。

東林寺貫休上人篆隸題詩

師名自越徹秦中。秦越難尋師所從。墨迹兩般詩一首。香鑪峰下似相逢。

寓江州李使君

使君曾被蟬聲苦。每見詞文卽爲愁。況是楚江鴻到後。可堪西望發孤舟。

游南寓題

江山節被雪霜遺。毒草過秋未擬衰。天不當時命鄒衍。亦將寒律入南吹。

和同年趙先輩觀文

玉兔輪中方是樹。金鰲頂上別無山。雖然迴首見烟水。事主酬恩難便閑。

出京別同年

一枝仙桂已攀援。歸去烟濤浦口村。雖恨別離還有意。槐花黃日出青門。

木芙蓉三首

黃鳥啼烟二月朝。若教開卽牡丹饒。天嫌青帝恩光盛。留與秋風雪寂寥。

卻假青腰女剪成。綠羅囊綻綵霞呈。誰憐不及黃花菊。只遇陶潛便得名。
須到露寒方有態。爲經霜裏稍無香。移根若在秦宮裏。多少佳人泣曉粧。

九日

陽數重時陰數殘。露濃風硬欲成寒。莫言黃菊花開晚。獨占樽前一日歡。

夏州道中

隴雁南飛河水流。秦城千里忍迴頭。征行渾與求名背。九月中旬住夏州。

經慈州感謝郎中

金聲乃克古詩流。況有池塘春草儔。莫遣宣城獨垂號。雲山彼此謝公遊。

寓題

吳中烟水越中山。莫把漁樵謾自寬。歸泛扁舟可容易。五湖高士是拋官。

寄宋明府

北闕秋期南國身。重關烟月五溪雲。風蟬已有數聲急。賴在陶家柳下聞。

靈均

莫問靈均昔日遊。江離春盡岸楓秋。至今此事何人雪。月照楚山湘水流。

和陳先輩陪陸舍人春日遊曲江

劉超遊召邳詵陪。爲憶池亭舊賞來。紅杏花旁見山色。詩成因觸鼓聲回。
花

莫道顏色如渥丹。莫道馨香過菖蘭。東風吹綻還吹落。明日誰爲今日看。

卷簾

綠鬢侍女手纖纖。新捧嫦娥出素蟾。衛玠官高難久立。莫辭雙卷水精簾。

啓帳

得人憎定繡芙蓉。愛鎖嫦娥出月踪。侍女莫嫌抬素手。撥開珠翠待相逢。

去扇

城上風生蠟炬寒。錦帷開處露翔鸞。已知秦女昇仙態。休把圓輕隔牡丹。

別後

夢裏相逢無後期。烟中解佩杳何之。虧蟾便是陳宮鏡。莫吐清光照別離。

嚴陵釣臺

終向烟霞作野夫。一竿竹不換簪裾。直鈎猶逐熊羆起。獨是先生真釣魚。

馬嵬三首

錦江晴碧劍峯奇。合有千年降聖時。天意從來知幸蜀。不關胎禍自蛾眉。

鐵馬嘶風一渡河。淚珠零使作驚波。鳴泉亦感上皇意。流下隴頭嗚咽多。
龍腦移香鳳輦留。可能千古永悠悠。夜臺若使香魂在。應作烟花出隴頭。

閏八月

無人不愛今年閏。月中看中秋兩度圓。惟恐雨師風伯意。至時還奪上樓天。

奉和翁文堯戲寄

掘蘭宮裏數名郎。好是乘輶出帝鄉。兩度還家還未有。別論光彩向冠裳。

奉和文堯對庭前十葉石榴

一朵千英綻曉枝。彩霞堪與別爲期。移根若在芙蓉苑。豈向當年有醒時。

全五代詩卷八十六

閩

崔道融

道融荊州人。以徵辟爲永嘉令。累官右補闕。避地入閩。依王審知。著有申唐詩三卷。東浮集九卷。十國春秋。道融素與黃滔善。其卒也。滔爲文祭之。有云。識通龜策。耀握靈珠。國風騷雅。王佐謀訐。袁安之滯泣。汶然。劉氏之宗祧莫扶。楊萬里詩話。道融有句云。如今卻羨相如富。猶有人間四壁居。詩格。道融邊庭雪詩。萬里一點白。

長空鳥不飛。俱爲人傳誦。唐音。唐宋志。載道融申唐詩三卷。東浮集九卷。申唐詩皆四言。述唐中世以前事。事爲一篇。篇各有小序。凡六十九篇。東浮集。乾寧乙卯。永嘉山齊所編。自稱東甌散人。時蓋避亂於永嘉。故云。高機謂爲永嘉令誤也。又考王審知福州金像碑。幕客中有道融名。而碑成于天祐四年。又在乾寧後。則其終于閩可知矣。所載御爲右補闕徵君云。申唐詩亡。東浮集所存止此。

梅花

數萼初含雪。孤標畫本難。香中別有韻。清極不知寒。橫笛和愁聽。斜枝倚病看。朔風如解意。容易莫催殘。

擬樂府子夜四時歌四首

吳子愛桃李。月色不到地。明朝欲看花。六宮人不睡。

涼軒待月生。暗裏螢飛出。低回不稱意。蛙鳴亂清瑟。

月色明如晝。蟲聲入戶多。狂夫自不歸。滿地無天河。
銀缸照殘夢。零淚落粉臆。洞房猶自寒。何況關山北。

長門怨

長門春欲盡。明月照花枝。買得相如賦。君恩不可移。

漢宮詞

獨詔胡衣出。天花落殿堂。他人不敢妬。垂淚向君王。

班婕妤

寵極辭同輦。恩深棄後宮。自題秋扇後。不敢怨春風。

銅雀妓二首

嚴妝垂玉筍。妙舞對清風。無復君王顧。春來起漸慵。
歌咽新翻曲。香銷舊賜衣。陵園風雨暗。不見六龍歸。

長安春二首

珠箔映高柳。美人紅袖垂。忽聞半天語。不見上樓時。
長安牡丹開。繡轂輾晴雷。若使花長在人。應看不回。

春閨二首

寒食月明雨。落花香滿泥。佳人持錦字。無雁寄遼曲。
欲剪宜春字。春寒入剪刀。遼陽在何處。莫望寄征袍。

元日有題

十載元正酒。相歡意轉深。自量麋鹿分。只合在山林。

春題二首

青春未得意。見花卻如讐。路逢白面郎。醉插花滿頭。
滿眼桃李花。愁人如不見。別有惜花人。東風莫吹散。

春晚

三月寒食時。日色濃于酒。落盡牆頭花。鶯聲隔原柳。

寒食夜

滿地梨花白。風吹碎月明。大家寒食夜。獨貯望鄉情。

月夕

月上隨人意。人閒月更清。朱樓高百尺。不見到天明。

春墅

蛙聲近過社。農事忽已忙。隣婦餉田歸。不見百花芳。

江村

日暮片帆落。江村如有情。獨對沙上月。滿船人睡聲。

田上

雨足高田白。披蓑半夜耕。人牛力俱盡。東方殊未明。

病起二首

病起春已晚。曳筇傷綠苔。強攀庭樹枝。喚作花未開。
病起繞庭除。春泥粘屐齒。如從萬里來。骨肉滿面喜。

月夕有懷

圓光照一海。遠客有孤舟。相憶無期見。中宵獨上樓。

江上逢故人

故里琴尊侶。相逢近臘梅。江村買一醉。破淚卻成咍。

訪僧不過

尋僧已寂寞。林下鎖山房。松竹雖無語。牽衣借晚涼。

過農家

欲羨農家子。秋新看刈禾。蘇秦無負郭。六印又如何。

牧豎

牧豎持豎笠。逢人氣傲然。臥牛吹短笛。耕卻傍谿田。

旅行

少壯經勤苦。衰年始浪游。誰憐不龜手。他處欲封侯。

夜泊九江

夜泊江門外。歡聲月下樓。明朝歸去路。猶隔洞庭秋。

西施灘

幸虧亡吳國。西施陷惡名。浣紗春水急。似有不平聲。

峽路

清猿啼不住。白水下來新。八月莫爲客。夜長愁殺人。

江夕

江心秋月白。起柁信潮行。蛟龍化爲人。半夜吹笛聲。

寄人二首

花上斷續雨。江頭來去風。相思春欲盡。未遣酒尊空。
澹澹長江水。悠悠遠客情。落必相與恨。到地一無聲。

古樹

古樹春風入。陽和力太遲。莫言生意盡。更引萬年枝。

槿花

槿花不見夕。一日一回新。東風吹桃李。須到明年春。

江鷗

白鳥波上栖。見人懶飛起。爲有求魚心。不是戀江水。

歸燕

海燕頻來去。西人獨滯留。天邊又相送。腸斷故園秋。

鑾駕東回

兩川花捧御衣香。萬歲山呼輦路長。天子還從馬嵬過。別無惆悵似明皇。

長門怨

長門花泣一枝春。爭奈君恩別處新。錯把黃金買詞賦。相如自是薄情人。

楊柳枝詞

霧撚烟搓一索春。年年長似染來新。應須喚作風流線。繫得東西南北人。

西施

學蘿山下如花女。占得姑蘇臺上春。一笑不能忘敵國。五湖何處有功臣。
楚懷王

宮花一朵掌中開。緩急翻爲敵國媒。六里江山天下笑。張儀容易去還來。
題李將軍傳

猿臂將軍去似飛。彎弓百步虜無遺。漢文自與封侯得。何必傷嗟不遇時。
羯鼓

華清宮裏打撩聲。供奉絲簧束手聽。寂寞鑿與斜谷裏。是誰翻得雨淋鈴。
馬嵬

萬乘淒涼蜀路歸。眼前珠翠與心違。重華不是風流主。湘水猶傳泣二妃。
讀杜紫微集

紫微才調復知兵。長覺風雷筆下生。還有枉拋心力處。多於五柳賦閒情。
寓題

海上乘槎便合仙。若無仙骨未如船。人間亦有支機石。虛被聲名到洞天。
寓吟集

陶集篇篇皆有酒。崔詩句句不無杯。醉來已共身安約。讓卻詩人作酒魁。

溪居卽事

籬外誰家不繫船。春風吹入釣魚灣。小童疑是有村客。急向柴門去卻關。

村墅

正月二月村墅間。餘糧未乏人心寬。南隣雨中揭屋笑。酒熟數家來相看。

秋夕

自憐三十未西遊。傍水尋山過卻秋。一夜雨聲多少事。不思也盡到心頭。

秋霽

雨霽長空蕩滌清。遠山初出未知名。夜來江上如鉤月。時有驚魚擲浪聲。

谿夜

積雪消來谿水寬。滿樓明月碎琅玕。漁人拋得釣筒盡。卻放輕舟下急灘。

酒醒

酒醒撥剔殘灰火。多少淒涼在此中。爐畔自斟還自醉。竹窗深夜雪兼風。

谿上遇雨二首

回塘雨腳如縑絲。野禽不起沈魚飛。耕蓑釣笠取未暇。秋田有望從淋漓。坐看黑雲銜猛雨。噴灑前山此獨晴。忽驚雲雨在頭上。卻是山前晚照明。

郊居友人相訪

柴門深掩古城秋。背郭緣谿一徑幽。不有小園新竹色。君來那肯暫淹留。

山居臥疾廣利大師見訪

桐谷孫枝已上絃。野人猶臥白雲邊。九天飛錫應相誚。三到行朝二十年。

寒食客中有懷

江上聞鶯禁火時。百花開盡柳依依。故園兄弟別來久。應到清明猶望歸。

關下

百二山河壯帝畿。關門何事更開遲。應從漏卻田文後。每度聞雞不免疑。

過隆中

元德蒼黃起臥龍。鼎分天下一言中。可憐蜀國關張後。不見商量徐庶功。

獻浙東柳大夫

屬城甘雨幾輕春。聖主全分付越人。俗眼不知青瑣貴。江頭爭看碧油新。

天台陳逸人

絕粒空山秋復春。欲看滄海化成塵。近拋三井更深去。不怕虎狼惟怕人。

鏡湖雪霽貽方干

天外曉嵐和雪望。月中歸棹帶冰行。相逢半醉吟詩苦。應抵寒猿梟樹聲。

寄李左司五季在臺

柏臺蘭省共清風。鳴玉朝聯夜被同。肯信人間有兄弟。一生長在別離中。

雪竇禪師

雪竇峰前一派懸。雪竇五月無炎天。客塵半日洗欲盡。師到白頭林下禪。

悲李拾遺二首

故友從來匪石心。諫多難得主恩深。行朝半夜烟塵起。曉殿吁嗟一鏡沈。
天涯時有北來塵。因話它人及故人。也是先皇能罪己。殿前頻得觸龍鱗。

謝朱常侍寄貺蜀茶剡紙二首

瑟瑟香塵瑟瑟泉。驚風驟雨起爐烟。一甌解卻山中醉。便覺身輕欲上天。
百幅輕明雪未融。辭家凡紙漫深紅。不應點染閒言語。留紀將軍蓋世功。

梅

谿上寒梅初滿枝。夜來霜月透芳菲。清光寂寞思無盡。應待琴尊與解圍。

對早梅寄友人二首

憶得前年君寄詩。海邊三見早梅詞。與君猶是海邊客。又見早梅花發時。

憶得去年有遺恨。花前未醉到無花。清芳一夜月通白。先脫寒衣送酒家。

釣魚

閒釣江魚不釣名。瓦甌斟月暮山青。醉頭倒向蘆花裏。卻笑無端犯客星。

雞

買得晨雞共雞語。常時不用等閒鳴。深山月黑風雨夜。欲近曉天啼一聲。

林寬

寬閩人與黃滔同時集一卷。

少年行

柳烟侵御道。門映夾城開。白日莫空過。青春不再來。報讐衝雪去。乘醉臂鷹迴。看取歌鍾地。殘陽滿壞臺。

寓興

西母一盃酒。空言浩劫春。英雄歸厚土。日月照閒人。衰草珠璣塚。冷灰龍鳳身。茂陵驪岫晚。過者暗傷神。

窮冬太學

投跡依槐館。荒庭草合時。雪深鳶嘯急。薪溼鼎吟遲。默坐同誰話。非僧不我知。匡廬瀑布畔。何日副心期。

關下早行

軋軋推危轍。聽雞獨早行。風吹宿靄散。月照華山明。白首東西客。黃河晝夜清。相逢皆有事。唯我是閒情。

朱坡

朱坡坡上望。不似在秦京。漸覺溪山秀。更高魚鳥情。夜吟禪子室。曉爨獵人鐙。恃此偷佳賞。九衢蝸未鳴。

陪鄭誠郎中假日省中寓直

憲廳名最重。假日許從容。床滿諸司印。庭高五粒松。井尋芸吏汲。茶拆岳僧封。鳥度簾旌暮。猶吟隔苑鐘。

塞上還答友人

無端遊絕塞。歸鬢已蒼然。戎羯圍中過。風沙馬上眠。草衰頻過燒。耳冷不聞蟬。從此甘貧坐。休言更到邊。

和友人賊後

帶號乞兵急。英雄陷賊圍。江山猶未靜。魚鳥欲何歸。城露桑榆盡。時平老幼稀。書從戰後得。讀徹血盈衣。

寄省中知己

門掩清曹晚。靜將烏府隣。花開封印早。雷下典衣頻。怪木風吹閣。廢巢時落薪。每憐吾道苦。長說向同人。

送昇道靖恭相公分司

東風時不遇。果見致君難。華岳影猶動。鷓鴣勢未安。星沈關鑿冷。雞唱驛燈殘。誰問二賓客。門閒嵩洛寒。

送惠補闕

詔下披巖野。高人入舊林。長因抗疏日。便作去官心。清俸供僧盡。滄洲寄跡深。東門有歸路。徒自棄華簪。

送李員外之建州

勾踐江頭月。客星臺畔松。爲郎久不見。出守暫相逢。烏泊牽灘索。花空押號鐘。遠人思化切。休上武夷峰。

送人幸浦城

東南猶阻寇。梨嶺更誰登。作宰應無俸。歸船必有僧。灘平眠獺石。燒斷飲猿藤。歲盡校殊最。方當見異能。

送謝石先輩歸宣州

名隨春色遠。湖外已先知。花盡方辭醉。鷲殘是放時。天寒千尺嶽。領白半聯詩。笋蕨猶堪採。榮歸及養期。

送許棠先輩歸宣州

髮枯窮律韻。字字合墳箴。日月所到處。姓名無不知。鶯啼謝守壘。苔老謫仙碑。詩道喪來久。東歸爲弔之。

送僧遊太白峰

雲深遊太白。莫惜遍探奇。頂上多靈跡。塵中少客知。懸崖倚凍瀑。飛狖過孤枝。出定更何事。相逢必有詩。

送人歸日東

滄溟西畔望。一望一心摧。地卽同正朔。天教阻往來。波翻夜作電。鯨吼晝爲雷。門外人蔘徑。到時花幾開。

哭栖白供奉

侍輦才難得。三朝有上人。琢詩方到骨。至死不離貧。風帳孤螢入。霜塔積葉頻。夕陽門半掩。過此亦無因。

哭造微禪師

神僊不火葬。新塔露疎檉。是物皆磨滅。唯師出死生。虛壑散釣叟。怪木哭山精。林下路長在。無因更此行。

省試臘後望春宮

皇都初度臘。鳳輦出深宮。高凭樓臺上。遙瞻灞澗中。仗疑霜彩白。袍映日華紅。柳眼方開凍。鶯聲漸轉風。御溝穿斷靄。驪岫照斜空。時見宸游興。因觀稼穡功。

和周繇校書先輩省中寓直

古木重門掩。幽深祗欠溪。此中真吏隱。何必更巖棲。名姓鐫幢記。經書逐庫題。字隨飛蠹缺。塔與落星齊。伴直僧談靜。侵霜蛩韻低。粘塵賀草沒。剝粉薛禽迷。賀知章書薛稷鶴也衰蘚牆千堵。微陽菊半畦。鼓殘鴉去北。漏在月沈西。每憶終南雪。幾登雲閣梯。時因搜句次。那借一招攜。

苦雨

霖霖翳日月。窮巷變溝坑。驟灑纖枝折。奔傾壞堵平。蒙臺來客絕。躍甃噪蛙聲。敗屐陰苔積。摧簷溼菌生。斜飛穿裂瓦。迸落打空鐺。葉底遲歸蝶。林中滯出鴛。潤侵書縫黑。冷浸髻絲明。牖暗參差影。塔寒斷續聲。尺薪功比桂。寸粒價高瓊。遙想管絃裏。無因識此情。

長安卽事

暝鼓才終復曉雞。九門何計出沈迷。樵童亂打金吾鼓。豪馬爭奔丞相隄。翡翠鬢欹釵上燕。麒麟衫束海中犀。須知不是詩人事。空憶泉聲菊畔畦。

曲江

曲江初碧草初青。萬穀千蹄匝岸行。傾國妖姬雲髻重。薄徒公子雪衫輕。瓊鑄狒狒遶觥舞。金蹙辟邪擎。撥鳴柳絮杏花留不得。隨風處處逐歌聲。

獻同年孔郎中

炊瓊蕪桂帝關居。賣盡寒衣典盡書。驅馬每尋霜影裏。到門常在鼓聲初。蟾枝交彩清蘭署。鸞珮排光映玉除。一顧深恩身未殺。爭期皎日負吹噓。

酬陳樵見寄

失意閒眠起更遲。又將羈薄謝深知。囊書旋入酒家盡。紗帽長依僧壁垂。待月句新遭鬼哭。尋山貌古被猿窺。光和才子多如此。除卻清吟何所爲。

光和中
和光
啓之合稱

寄何紹

雁過君猶未入城。清賢門下早知名。風波凍馬遙相見。革屨饑僮尙挈行。住在閑坊無轍跡。別來何寺有泉聲。芙蓉苑北曲江岸。期看終南新雪晴。

長安遣懷

醉下高樓醒復登。任從浮薄笑才能。青龍寺裏三門上。立爲南寺不爲僧。

華清宮

殿角鐘殘立宿鴉。朝元歸駕望無涯。香泉空浸宮前草。未到春空爭發花。

終南山

標奇聳峻壯長安。影入千門萬戶寒。徒自倚天生氣色。塵中誰爲舉頭看。

歌風臺

蒿棘故存百尺基。酒酣曾唱大風時。莫言馬上得天下。自古英雄盡解詩。

下第寄歐陽瓚

詩人道僻命多奇。更值干戈亂起時。莫作江寧王少主。一生吟苦竟誰知。

聞雁

接影橫空背雪飛。聲聲寒出玉關遲。上陽宮裏三千夢。月冷風清聞過時。

王滌

滌字用霖。瑯琊人。景福中擢第。累官中書舍人。後終于閩。

和三鄉詩

浣紗游女出關東。舊跡新詞一夢中。槐陌柳亭何限事。年年迴首向春風。

柯崇

崇閩人。天復元年進士第。授太子校書。歸閩卒。

宮怨二首

塵滿金爐不炷香。黃昏獨立重廊。笙歌何處承恩寵。一一隨風入上陽。
長門槐柳半蕭疎。玉輦沈思恨有餘。紅淚漸消傾國態。黃金誰爲達相如。

